

## ROMANOS

*Pablo Roma marãrẽ õãdoredea*

<sup>1</sup> Y<sub>u</sub> Pablo, Jesucristore moãboegu aãrã. Marĩp<sub>u</sub> yure ãgũ masakare tauri kerere buedoregu beyepĩmi.

<sup>2</sup> Iripoegue Marĩp<sub>u</sub> ãgũyare weredupuyunerãrẽ iri kerere weredi aãrĩmĩ. Irasirirã irire ãgũya werenĩrĩ gojadea pũgue gojanerã aãrĩmã. <sup>3</sup> ãgũsã gojadea, Marĩp<sub>u</sub> magũ marĩ Op<sub>u</sub> Jesucristoya kere aãrã. ãgũta i ãmũguere marĩ irirosũ dupakũgu deyoagu, David parãmi aãrĩturiagu aãrĩdi aãrĩmĩ.

<sup>4</sup> ãgũ, Õãgũ deyomarĩgũrẽ opagu aãrĩmi. ãgũ boadero p<sub>u</sub>r<sub>u</sub>, Marĩp<sub>u</sub> ãgũ turari merã ãgũrẽ masũdi aãrĩmĩ aãrĩpererãrẽ: “Diayeta y<sub>u</sub> magũ aãrĩmi”, ãrĩ ãmugũ. <sup>5</sup> ãgũta gũare õãrõ irigu, Jesucristo merã ãgũyare weredoregu pĩmi, aãrĩpereri buri marãrẽ ãgũrẽ bũremurãno ãgũ dorerire iriburo, ãrĩgũ. <sup>6</sup> Mũsãdere Jesucristoyarã aãrĩburo, ãrĩgũ, beyedi aãrĩmĩ.

<sup>7</sup> Irasirigu y<sub>u</sub> mũsãrẽ Marĩp<sub>u</sub> beyenerãrẽ aãrĩpererã Roma marãrẽ õãdorea. Marĩp<sub>u</sub> aãrĩnĩgũ, marĩ Op<sub>u</sub> Jesucristo mũsãrẽ õãrõ iritamu, siuñajãrĩ merã aãrĩrikũmakũ iriburo.

*Pablo: “Romague waadũakoa”, ãrĩ gojadea*

<sup>8</sup> Ire mũsãrẽ werepũrorigũra. Aãrĩperero marã masaka, mũsã Jesucristore bũremurĩrẽ werenĩpereakõãma. Irire pẽgu, Jesucristo iritamurĩ merã Marĩp<sub>u</sub>re usuyari sãa. <sup>9</sup> Aãrĩpereri y<sub>u</sub> turari merã Marĩp<sub>u</sub> yure dorerosũta masakare ãgũ

magũya kerere werea. Irasirigu ĩgũrẽ sērēriku, mũsāya āārĩburire sērēbosaníkõāa. Marĩpu irire masĩmi. <sup>10</sup> Irasirigu Marĩpure: “Mu yure Romague iriudũagu, yu waaburire āmuyuka!” ārĩ sērēnāa. <sup>11</sup> Mũsā puro ejagu, gũñaturari merā Jesúre bũremunemoburo, ārĩgũ, ĩgũyare weredũakoa, Ōāgũ deyomarĩgũ yure iritamurõsũta mũsādere iritamuburo, ārĩgũ. <sup>12</sup> Marĩ Jesúre bũremurā āārā. Irasirirā mũsā, yu ĩgũrẽ bũremumakũ ĩārā, nemorõ gũñaturarākoa. Yũde, mũsā ĩgũrẽ bũremumakũ ĩāgũ, gũñaturagũakoa.

<sup>13</sup> Yaarā, yu mũsā puro waadũarire masĩmakũ gāāmekoa. Gajero marā masaka yu Jesúya kerere weremakũ pérā, ĩgũrẽ bũremuma. Irasirigu mũsāya makā marādere irire weregu waadũakoa, ĩgũsāde ĩgũrẽ bũremuburo, ārĩgũ. <sup>14</sup> Marĩpu yure āārĩpererārē iri kerere weredoremi. Paga makārĩ marārē, mutā makārĩ marārē, masĩrārē, masĩmerādere weredoremi. <sup>15</sup> Irasirigu mũsāya makā marārē Jesúre bũremumerārē ĩgũya kerere bũro weredũakoa.

*Jesúya kerere pérā, ĩgũrẽ bũremunũgārākuma, ārĩ gojadea*

<sup>16</sup> Masaka iri kerere pérā, ĩgũrẽ bũremunũgārākuma. Irasirigu Marĩpu āārĩpererā Jesúre bũremurārē ĩgũ turari merā taugũkumi, perebiri peamegue waabirikõāburo, ārĩgũ. Judío masaka, judío masaka āārĩmerāde iri kerere pé, ĩgũrẽ bũremumakũ, Marĩpu ĩgũsārē taugũkumi. Irasirigu yu, gũyasĩrĩrĩ marĩrõ gũñaturari merā iri kerere werea.

17 Iri kere àsũ ãrã. Marĩpũ Jesucristore bũremurã direta: “Õãrã ããrĩma”, ãrĩ ããmi. Marĩpũya kerere gojadea pũguedere àsũ ãrĩ gojasũdero ããrĩbũ: “Marĩpũ irasũ bũremurãrẽ: ‘Õãrã ããrĩma’, ãrĩ ããmi. Irasirirã ãgũ merã ããrĩnĩkõãrãkuma”, ãrĩ gojasũdero ããrĩbũ.

*Masaka ãgũsã ñerĩ iriri merã waja opama, ãrĩ gojadea*

18-19 Marĩpũ masakare ãgũyamarẽ õãrõ masĩmakũ yãmi. ãgũ irire masĩmakũ irikererũ, ñerĩrẽ yãma. Irasirirã Marĩpũya diayemarẽ masĩmerã dujama. Irasirigũ Marĩpũ ãmũgasigue ããrĩgũ ããrĩpererã diayemarẽ irimerãrẽ, ñerõ irirãrẽ ãgũ bũro wajamoãburire masĩmakũ yãmi. 20 Marĩpũ deyomarĩgũ ããrĩkererũ, ãgũ neõgorague i ãmũrẽ ããrĩpereri iridea merã ãgũ perebiri turarire, ãgũyamarẽ masĩsũa. Irasirirã masaka ãgũrẽ: “Masĩbirisĩã, waja opabea”, ãrĩmasĩbirikuma.

21 Marĩpũyamarẽ masĩkererã, ãgũrẽ: “Õãtaria mũ”, ãrĩ bũremubema. ãgũ õãrõ irikererũ, ãgũrẽ: “Õãa”, ãrĩ, usũyari sĩbema. Irasirirã ãgũyare pẽmasĩmerã dujama. Ñerĩ direta gũñarĩ opama. Irasiriro ãgũsã gũñarĩguere naĩĩãrõ irirosũ ããrã. 22 “Gũã masĩrã ããrã”, ãrĩkererã, Marĩpũyare neõ pẽmasĩmerã waama. 23 Irasirirã Marĩpũ ããrĩnĩgũ gapũre bũremubema. Pũrũgue boaburi gapũre: masaka keorire, mirã, waimũrã paãrã, pĩrũa keori ãgũsã weadeare bũremuma.

24 Irasirigũ Marĩpũ ãgũsãrẽ ãgũsã ñerĩrẽ ãaribejari direta irinaburo, ãrĩgũ, bẽomi. Irasirirã gũyasĩũrõ ñerĩrẽ gãme irinĩkõãma. 25 Marĩpũya diayema

gapure buremubema. Ārīgatori direta ðārð péma. Irasirirā Marīpū āārīpereri i ūmumarē iridi gapure buremumerā, Īgū iridea gapure buremuma. Īgūsā Īgūrē buremubirikerepuru, marī gapu Īgūrē: “Ōātaria mu”, ārī, usuyari sīnīkðārð gāāmea. Irasūta irirā!

<sup>26</sup> Īgūsā buremubiri waja Marīpū Īgūsārē béomi, Īgūsā gāāmerð gūyasīūrð ñerīrē iriburo, ārīgū. Irasirirā nome ūmarē marāpukudubema. Nome basita gāme marāpukuduarā irirosū āārīma. Irasirirā Īgūsā nome seyaro ñerð yāma. <sup>27</sup> Ūmade irirosūta yāma. Nomerē marāpokudubema. Ūma basita gāme marāpokuduarā irirosū āārīma. Īgūsā ūma seyaro ñerð yāma. Irasirirā Īgūsā basita ñerð iriri waja Īgūsāya duparire poyanorēma.

<sup>28</sup> Īgūsā Marīpūre masīdubiri waja Īgūsārē béomi, ñerī gūñarī direta opaburo, ārīgū. Irasirirā noó gāāmerð ñerīrē irinīkðāma. <sup>29</sup> Āārīpereri ñerīrē iririkuma. Ūma nome merā, nome ūma merā ñerð iririkuma. Ņetariro iririkuma. Gajerāyare buro gāāmema. Gajerārē ñerð iridubama. Gajerā gajino opamakū ĩārā, Īgūsārē ĩaturima. Gāmewējērikurā, gāmekēārikurā, ārīgatorikurā, ñerð āārīrikurā, buro kerekurā āārīma. <sup>30</sup> Gajerārē ārīgatori merā ñerð ārī werenīma. Marīpūre gāāmemerā dooma. Gajerārē ĩāmuīrikuma. “Gajerā nemorð āārā”, ārī gūñarā: “Ōārð yāa”, ārī weregorenama. Gajerosūperi ñerī iririre iribokadubama. Īgūsā pagūsāmarārē tarinugārikuma. <sup>31</sup> Ōārīrē pémasīdubema. Gajerārē: “Āsū irirāra”, ārīdeare neð keoro iribema. Neð sugunorē maīrī merā

ĩābema. Īgūsārē gajerā ñerō irideare neō kātimasĩbema. Gajerārē bopoñabema. <sup>32</sup> Marĩpũ irasirirārē: “Wajamoãgũra”, ārĩderosũta irigũkumi. Perebiri peamegue béogũkumi. Īgūsārē béoburire masĩkererā, ñerĩrē neō piribema. Gajerā ĩgūsā irirosũ ñerĩrē irimakũ ĩārā, õārō ɯɯyari merā ĩāma.

## 2

*Ñerĩ irirārē Marĩpũ diayeta wajamoãgũkumi, ārĩ gojadea*

<sup>1</sup> Irasirirā gajerārē werewɯarā ĩgūsā irirosũ irikererā, mɯsā basita werewɯarā yāa. Īgūsārē: “Īgūsā ñerō iriri waja, waja opama”, ārĩrā, mɯsā basita: “Gɯade waja opāa”, ārĩrā irirosũ ārĩrā yāa. <sup>2</sup> Marĩpũ ñerĩ irirārē: “Īgūsā ñerĩ iriri waja, wajamoãgũra”, ārĩgũ, diayeta ārĩgũ yāmi. Irire masĩa marĩ. <sup>3</sup> Mɯsā gajerārē: “Ñerō yāma”, ārĩ werewɯarā, ĩgūsā irirosũ irikererā: “Marĩpũ gɯa gapɯre wajamoãbirikumi”, ¿ārĩ gũñarĩ? Irire irasũ ārĩ gũñabirikōāka! Marĩpũ mɯsādere mɯsā ñerō iriri waja, wajamoãgũkumi.

<sup>4</sup> Mɯsā ñerĩ irirā: “Marĩpũ gɯare bɯro bopoñarĩ merā ĩāgũ, mata wajamoãbemi”, ārĩ gũñabirikōāka! Óārō pémasĩka! Mɯsā ñerō iririre bɯjaweremakũ ĩādɯagɯ, mɯsā gũñarĩrē gorawayumakũ ĩādɯagɯ, mata wajamoãbemi.

<sup>5</sup> Mata wajamoãbirikeregɯ, mɯsā ĩgũrē neō pébirimakũ ĩāgũ, ñerō iririre neō piridɯabirimakũ ĩāgũ, mɯsā merā guanemomi. Irasirigɯ pɯrɯgue āārĩpererā ñerārē ĩgũ wajamoārĩɯ ejamakũ, mɯsārē bɯro wajamoãgũkumi. Īgũ irasirimakũ

ĩārā, āārĩpererā: “Diayeta ĩgūsārē wajamoāgūta yāmi”, ārĩ masĩrākuma. <sup>6</sup> Irinũrē Marĩpũ masakakũre ĩgūsā irideare ĩā beye, keoro wajarigũkumi. <sup>7</sup> Ōārĩrē irinĩrā gapũ: Marĩpũ merā āārĩdũarā: “Musā ōārō yāa”, ārĩmakũ pėdũarā, ĩgũ pũrogue perebiri okarire opadũarā āārĩma. Irasirigũ ĩgūsārē perebiri okarire sĩgũkumi, ĩgũ merā āārĩnĩkōāburo, ārĩgũ. <sup>8</sup> ĩgūsā gāamerō irirā gapũ diayemarē iridũabema. Ñerĩ direta iridũama. Irasirigũ Marĩpũ ĩgūsā merā gua, bũro ĩgūsārē wajamoāgũkumi. <sup>9</sup> Āārĩpererā ñerĩ irirā ñerō tari, bũro gũñarĩkũrākuma. Judío masakare waapũrorirokoa. Judío masaka āārĩmerādere irasũta waarokoa. <sup>10</sup> Marĩpũ āārĩpererā ōārĩ irirā gapũre: “Ōārō yāma”, ārĩ ĩāgũkumi. ĩgūsārē ĩgũ merā ōārō āārĩmakũ irigũkumi. Irasirigũ siuñajārĩ opamakũ irigũkumi. Judío masakare irire iripũrorigũkumi. Judío masaka āārĩmerādere irasũta irigũkumi.

<sup>11</sup> Marĩpũ marĩ āārĩpererārē: judío masakare, judío masaka āārĩmerādere sũrosũta ĩāmi. <sup>12</sup> Judío masaka āārĩmerā, Marĩpũ Moisére doreri pĩdeare opabirikererā ñerĩ irimakũ ĩāgũ, Marĩpũ ĩgūsārē perebiri peamegue béogũkumi. Judío masaka ĩgũ doreri pĩdeare oparāde ñerĩ irimakũ ĩāgũ, ĩgūsādere irire tarinũgārĩ waja, wajamoāgũkumi. <sup>13</sup> ĩgũ Moisére doreri pĩdeare pėkererā irire iribirimakũ ĩāgũ, ĩgūsārē: “Ōārā āārĩma”, ārĩ ĩābemi. Irire irirā gapũre: “Ōārā āārĩma”, ārĩ ĩāmi. <sup>14</sup> Judío masaka āārĩmerā Marĩpũ Moisére doreri pĩdeare opabirikererā ōārō irirā, Marĩpũ dorederosũta

yáma. Irasirirã ìgūsã basi Marĩpu doredeare oparã irirosũ irire yáma. <sup>15</sup> Marĩpu ìgūsã gũñarĩgue ìgũ doredeare masĩmakũ iridi ããrĩmĩ. Irasirirã ìgũ dorederosũta irirã, irire masĩrã irirosũ yáma. Õãrõ irirã, o ñerõ irirã, ìgūsã gũñarĩ merã ìgūsã irideare masĩma. Ñerĩrẽ irianerã: “Waja opáa”, ãrĩ gũñama. Irasũta õãrĩrẽ irianerãde: “Waja opabea”, ãrĩ gũñama.

<sup>16</sup> Irasirigu Marĩpu ããrĩpererã ñerãrẽ wajamoãrĩnu ejamakũ, Jesucristore: “Ããrĩpererã gũñarĩrẽ, ìgūsã gajerã ìãberogue irideare ìã beyeka!” ãrĩgukumi. Irasirigu Jesucristo ñerĩ gũñarĩ oparãrẽ, ñerĩ iririkurãrẽ: “Wajamoãgura”, ãrĩgukumi. Õãrĩ gũñarĩ oparãrẽ, õãrõ iririkurãrẽ: “Wajamoãbirikoa”, ãrĩgukumi. Marĩpu masakare tauri kerere buegu, irireta buea yu.

### *Marĩpu Moisére doreri pídeamarẽ gojadea*

<sup>17</sup> Mũsã gapu: “Gua judío masaka Marĩpu Moisére doreri pídeare buremusĩã, gajerã nemorõ Marĩpuyarã ããrã”, ãrĩ gũñadáa. <sup>18</sup> Gajire ãsũ ãrĩ gũñáa: “Gua Marĩpu gããmerĩrẽ, ìgũ Moisére doreri pídeare masĩrã ããrĩsĩã, õãrĩ direta beyemasĩa. <sup>19</sup> Irasirirã koye ìãmerãrẽ tũãdupuyuwãgãrã irirosũ Marĩpuyare masĩmerãrẽ buemasĩa. Naĩtĩãrõgue ããrĩrãrẽ sĩãgoro irirosũ diayema iririre masĩmerãrẽ diayema gapure ìgūsãrẽ iridorea. <sup>20</sup> Marĩpu Moisére doreri pídeare opasĩã, diayema iririre õãrõ masĩa. Irasirirã masĩmerãrẽ, majĩrã irirosũ ããrĩrãrẽ buerimasã ããrã”, ãrĩ gũñadáa mũsã. <sup>21</sup> Gajerãrẽ irasũ ãrĩ buekererã, ¿nasirirã mũsã basi bueberi? “Yajabirikõãka!” ãrĩ buekererã, ¿nasirirã yajari mũsã? <sup>22</sup> “Gajigu

marãpo, gajego marãpɯ merã ñerõ iribirikõãka!”  
 ãrĩ buekererã, ¿nasirirã irasũ yári? Masaka  
 bɯremurĩ keori weadeare dookererã, ¿nasirirã  
 ãgũsã bɯremurĩ wiirimarẽ yajari, irire opamurã?  
 23 “Marĩpɯ Moisére doreri pídeare opasĩã, gajerã  
 nemorõ ããrã”, ãrĩ gũñakererã, iri dorerire  
 tarinugãrã, gajerãdere ãgũrẽ bɯremubirimakũ  
 irirã yáa. 24 Marĩpɯya werenĩrĩ gojadea pũgue  
 mɯsã irasiririre ãsũ ãrĩ gojasũdero ããrĩbú: “Mɯsã  
 judío masaka, judío masaka ããrĩmerãrẽ Marĩpɯre  
 ñerõ ãrĩ werenĩmakũ yáa”, ãrĩ gojasũdero ããrĩbú.

25 Mɯsã judío masaka Marĩpɯ Moisére doreri  
 pídeare irirã, mɯsãya dupɯma gasirogãrẽ\*  
 wiirisũnerã ããrĩmakũ õãgoráa. Marĩpɯ mɯsãrẽ:  
 “Yaarã ããrĩma”, ãrĩ ããmi. Irire tarinugãrã, mɯsãya  
 dupɯma gasirogãrẽ wiirisũbirinerã irirosũ ããrã.  
 26 Judío masaka ããrĩmerã irasũ wiirisũbirinerã  
 ããrĩkererɯɯ, Marĩpɯ Moisére doreri pídeare  
 irimakũ: “Yaarã ããrĩma”, ãrĩ ããgɯkumi. Judío  
 masakadere ãgũsã irire irimakũ, irasũta ãrĩ  
 ããgɯkumi. 27 Judío masaka ããrĩmerã gapɯ ãgũsãya  
 dupɯma gasirogãrẽ wiirisũbirinerã ããrĩkererã,  
 Marĩpɯ doredeare irirã, mɯsãrẽ judío masakare  
 iri doredeare oparãrẽ mɯsã irire tarinugãrĩ waja:  
 “Waja opama”, ãrĩrãkuma. 28 Sugɯ judío masakũ  
 irasũ wiirisũdi: “Marĩpɯyagɯ ããrã”, ãrĩ gũñakeregɯ,  
 Marĩpɯre bɯremubi, díayeta Marĩpɯyagɯ, judío

\* 2:25 Gn 17.1-14: Iripoegue Marĩpɯ Abrahãrẽ ãgũ pũrã ãmarẽ:  
 “Yaarã ããrĩburo”, ãrĩgũ, ãgũsãya dupɯma gasirogãrẽ wiiridoredi  
 ããrĩmĩ. Pɯɯ iri dorerire Moisére pídi ããrĩmĩ. Irasirirã judío masaka  
 Abraham parãmerã ããrĩturiarã iri dorerire irirã, ãgũsã pũrã ãmarẽ  
 su mojóma pere gaji mojó ɯgeru pẽrẽbejarinãrĩ waaró merã ãgũsã  
 deyoadero pɯɯ irasũ yáma.

masakugora ããrĩbemi. <sup>29</sup> Marĩpuyarã gapu irasũ wiirisũnerã dita ããrĩbema. Ōãgũ deyomarĩgũ ĩgũsãya gũñarĩgue ōãrĩ merã gorawayumakũ iridero puru, ĩgũsã Marĩpuyarã, judío masakagora ããrĩma. Masaka ĩgũsãrẽ: “Ōãrã ããrĩma”, ãrĩ ĩãbirikerepuru, Marĩpu gapu: “Ōãrã ããrĩma”, ãrĩ ĩãmi.

### 3

<sup>1</sup> Musã, yu irasũ ãrĩmakũ pérã: “¿Gua judío masaka, guaya dupuma gasirogãrẽ wiirisũnerã ããrĩrĩ wajamarĩkuri?” ¿ãrĩ gũñarĩ? <sup>2</sup> Gua judío masaka ããrĩmakũ ōãgorãa. Marĩpu guare wãri ōãrĩrẽ sĩdi ããrĩmĩ. Irasirigu guare ĩgũya kerere pĩpuroridi ããrĩmĩ, irire gajerãrẽ weredoregu. <sup>3</sup> Yu irasũ ãrĩmakũ pérã: “Judío masaka surãyeri Marĩpu ĩgũsãrẽ: ‘Ãsũ irigura’, ãrĩdeare baremubirimakũ, irire iribirikumi” ¿ãrĩ gũñarĩ? <sup>4</sup> Neõ irasũ ãrĩ gũñabirikõãka! ããrĩpererã masaka ãrĩgatokerepuru, Marĩpu gapu neõ ãrĩgatobemi. ĩgũya werenĩrĩ gojadea pũgue ãsũ ãrĩ gojasũdero ããrĩbũ:

Gupuru, mu werenĩrĩ merã masakare mu diayema iririre masĩmakũ yãa. Mu ãrĩderosũta keoro irimakũ, neõ sugu masaku marẽ: “Diaye iribemi”, ãrĩmasĩbirikumi, ãrĩ gojasũdero ããrĩbũ.\*

<sup>5</sup> Gajerã irire pérã, ãsũ ãrĩmoãmabokuma: “Gua ñerõ iriri merã Marĩpu diaye iriri masakare masĩmakũ yãa. Gua irasirikerepuru, Marĩpu guare wajamoãgũ, diaye iribemi”, ãrĩbokuma. <sup>6</sup> Neõ irasũ ããrĩbea. ĩgũsã irasũ ãrĩrĩ keoro ããrĩmakũ,

\* 3:4 Sal 51.4

Marĩpu neõ sugunorẽ ãgũsã ñerõ irikerepuru, wajamoãbiribokumi.

<sup>7</sup> Gajerã idere arĩmoãmabokuma: “Gua arĩgatori merã Marĩpu arĩgatobi aãrĩrĩrẽ masakare masĩmakũ yãa. Irasirirã ãgũrẽ: ‘Õãtarimi’, arĩ buremuma. Gua irasirikerepuru, Marĩpu guare wajamoãgũ, diaye iribemi”, arĩbokuma. <sup>8</sup> Æsũ arĩbokuma doja: “Gua ñerĩ irimakũ, gajerã Marĩpu õãgũ aãrĩrĩ gapure masĩnemorãkuma”, arĩbokuma. Surãyeri guare ñerõ gũñarĩ merã: “Pablosãde irasũta arĩ buema”, arĩ werenĩma. ãgũsã irasũ arĩrĩ waja Marĩpu ãgũsarẽ wajamoãgũ, diayeta irigukumi.

*Ããrĩpererã masaka waja oparã dita aãrĩma, arĩ gojadea*

<sup>9</sup> ¿Naãsũ arĩ gũñarĩ? ¿Marĩpu iũrõ marĩ judío masaka, gajerã nemorõ õãrã aãrĩrĩ? Neõ irasũ aãrĩbea. Marĩ aãrĩpererã judío masaka, judío masaka aãrĩmerãde ñerõ irirã aãrĩsĩã, waja oparã dita aãrã. Irire yu musãrẽ weresiabu.

<sup>10</sup> Marĩpuya werenĩrĩ gojadea pũgue Æsũ arĩ gojasũdero aãrĩbũ:

Neõ suguno õãgũ mámi. Neõ marĩgorakõãmi.

<sup>11</sup> Neõ Marĩpuyare pémasĩgũ mámi. Neõ suguno ãgũrẽ masĩdũagu mámi.

<sup>12</sup> Aãrĩpererã Marĩpuyare irituyamerã, dedirimurã dita aãrĩma. Neõ suguno õãrĩrẽ irigu mámi. Neõ marĩgorakõãmi.✧

<sup>13</sup> Masãgobe toyori gobe arĩwiurosũ ãgũsã ñerĩ werenĩrĩ aãrã. Arĩgatorikuma. Æña disigue nima opagu irirosũ pũrĩrõ werenĩma.✧

✧ 3:12 Sal 14.1-3; 53.1-3 ✧ 3:13 Sal 5.9; 140.3

- 14 Ñerĩ direta werení, gajerãrẽ dojama. Buro turirikuma.✧
- 15 Masakare wějěbéoduari direta opasurima.
- 16 Noó ĩgūsã waaró masakare poyanorẽ, ĩgūsãrẽ ñerõ tarimakũ yáma.
- 17 Gajerãrẽ siuñajãrĩ merã ããrĩmakũ neõ iribema.✧
- 18 Marĩpũre goepeyari merã buremubema. Irasirirã ĩgũrẽ güibema, ãrĩ gojasũdero ããrĩbũ.✧
- 19 Marĩ ire masĩa. ããrĩpererã Moisés doreri gua judío masakare: “Ãsũ irika!” ãrĩ pídeare iripeobirisĩã: “Waja opabea”, ãrĩmasĩbema. Irasirirã ããrĩpererã judío masaka, judío masaka ããrĩmerãde waja opasĩã, Marĩpũ wajamoãsũmurã dita ããrĩma.
- 20 Neõ sugũ masakũ Moisés doredeare iripeomasĩbemi. Irasirigũ: “Marĩpũ yũre: ‘Õãgũ ããrĩmi’, ãrĩ ĩãgukumi”, ãrĩmasĩbirikumi. Marĩpũ iri dorerire pídea merãta marĩrẽ: “Ñerã ããrã”, ãrĩ masĩmakũ yámi.

*Marĩ Jesucristore buremurĩ merã tausũrãkoa, ãrĩ gojadea*

21-22 Daporare Marĩpũ marĩrẽ ire masĩmakũ yámi. Marĩ Jesucristore buremumakũ, ĩgũ Moisére doreri pídeare iripeobirikerepũrũ, marĩrẽ: “Õãrã, waja opamerã ããrĩma”, ãrĩ ĩãmi. Irasirigũ marĩ ããrĩpererãrẽ Jesucristore buremurãrẽ sũrosũta ĩãmi. ĩgũ irasũ ãrĩ ĩãburire Moisés, gajerã ĩgũyare weredupuyurimasãde ĩgũya kerere gojadea pũgue gojanerã ããrĩmã.

✧ 3:14 Sal 10.7 ✧ 3:17 Is 59.7-8 ✧ 3:18 Sal 36.1

<sup>23</sup> Marĩ ããrĩpererã ñerĩ irirã dita ããrã. Irasirirã, Marĩpu: “Y<sub>u</sub> merã õãrõ ããrĩrãkoa”, ãrĩdeare marĩ basi neõ bokabirikoa. <sup>24</sup> Marĩ irasũ ããrĩkerepu<sub>u</sub>, Marĩpu marĩrẽ maĩgũ ĩgũ magũ Jesucristore iriudi ããrĩmĩ, marĩ ñerĩ iridea wajare wajaribosadoreg<sub>u</sub>. Irasirigu, marĩrẽ Jesucristore buremurãrẽ: “Waja opamerã ããrĩma”, ãrĩ ĩãmi. <sup>25</sup> Marĩpu Jesucristore ããrĩpererã masakare ĩgũsã ñerĩ iridea wajare wajaridoreg<sub>u</sub>, ĩgũrẽ iriudi ããrĩmĩ. Irasirigu, Jesucristo boag<sub>u</sub> dí béodea merã ĩgũrẽ buremurãrẽ ĩgũsã ñerĩ iridea wajare kãtidi ããrĩmĩ. Bopoñagũ ããrĩsĩã, iripoegue marãdere ĩgũsã ĩgũ: “Ãsũ irigũra”, ãrĩdeare buremudea merã ĩgũsã ñerõ iridea wajare kãtidi ããrĩmĩ. Irire irigu, ĩgũ diaye irigu ããrĩrĩrẽ ĩmudi ããrĩmĩ. <sup>26</sup> Marĩpu ðapora marãdere Jesús marĩ ñerĩ iridea wajare wajaribosadea merã ĩgũrẽ buremurãrẽ: “Õãrã, waja opamerã ããrĩma”, ãrĩ ĩãmi. Irasirigu marĩrẽ ĩgũ diaye irigu ããrĩrĩrẽ masĩmakũ yãmi.

<sup>27</sup> Irasirirã Marĩpu ĩũrõ marĩ basita: “Õãrã ããrã, ĩgũ Moisére doreri pídeare iripeorã yãa”, ãrĩmasĩbea. Ãsũ gap<sub>u</sub> ãrĩ masĩa. Marĩpu, Jesúre marĩ buremumakũ, marĩrẽ: “Õãrã ããrĩma”, ãrĩ ĩãmi. <sup>28</sup> Ire masĩa. Marĩpu Moisére doreri pídeare marĩ irimakũ meta marĩrẽ: “Õãrã ããrĩma”, ãrĩ ĩãmi. Marĩ Jesúre buremumakũ, marĩrẽ: “Õãrã ããrĩma”, ãrĩ ĩãmi.

<sup>29-30</sup> ¿Marĩpu judío masaka direta Op<sub>u</sub> ããrĩrĩ? Neõ irasũ ããrĩbemi. Judío masaka, judío masaka ããrĩmerãdere ĩgũ suguta ããrĩpererã Op<sub>u</sub> ããrĩmĩ. Irasirigu, ĩgũsã Jesúre buremumakũ: “Õãrã, waja opamerã ããrĩma”, ãrĩ ĩãmi. <sup>31</sup> Irasirirã marĩ Jesúre

buremurã, ¿Marĩpu Moisére doreri pídeare béorã yári? Æãrĩbea. Marĩ ìgũrẽ buremurã Marĩpu dorerire nemorõ irinemowãgãrãkoa.

## 4

*Pablo, Abraham Marĩpũre buremudeare gojadea*

<sup>1</sup> Irasirirã, ¿naásũ ãrĩrãkuri Abrahãrẽ, marĩ ñekũ ããrĩpũroridire? ¿Naásũ waayuri ìgũrẽ?

<sup>2</sup> Marĩpu Abrahãrẽ: “Õãrõ irigu ããrĩsĩã, õãgũ ããrĩmi”, ãrĩ ìãbodi ããrĩkerepũru, Abraham ìgũ basi: “Marĩpu ìũrõ õãrõ yáa”, neõ ãrĩmasĩbiriunadi ããrĩmí. <sup>3</sup> Marĩpũya werenĩrĩ gojadea pũgue ãsũ ãrĩ gojasũdero ããrĩbú: “Abraham Marĩpũre buremumakũ, Marĩpu ìgũrẽ: ‘Õãgũ ããrĩmi’, ãrĩ ìãdi ããrĩmí”, ãrĩ gojasũdero ããrĩbú.

<sup>4</sup> Æsũ ããrã. Sugũ gajino moãdire wajarirã, irasũ sĩkõãrã meta irikuma. Ìgũ moãdea waja wajarirã irikuma. <sup>5</sup> Marĩpu gapũ irasiribemi. Ñerãrẽ, ìgũsã õãrĩrẽ iribirikerepũru, ìgũrẽ buremumakũ: “Waja opamerã ããrĩma”, ãrĩ ìãmi. Irasirigu, marĩ ìgũrẽ buremumakũ: “Yũ ìũrõ õãrã ããrĩma”, ãrĩ ìãmi.

<sup>6</sup> Iripoeguemu Davide yũ ãrĩrõsũta gojadi ããrĩmí. Marĩpu masaka iririre ìãgũ: “Õãrã ããrĩma”, ãrĩ ìãgũ meta ããrĩmi. Ìgũrẽ buremurã direta: “Õãrã ããrĩmá”, ãrĩ ìãgũ ããrĩmi. Irasirirã ìgũ merã õãrõ mũyama. <sup>7</sup> Irire ãsũ ãrĩ gojadi ããrĩmí David:

Marĩpu dorerire tarinũgãrãrẽ ìgũsã ñerõ iridea wajare ìgũ kãtimakũ, õãrõ mũyama.

8 Marĩpu ĩgũsã ñerõ iridea wajare: “Neõ gũñabirikoa”, ãrĩmakũ, õãrõ usuyama, ãrĩ gojadi ããrĩmĩ David.\*

9 Judío masaka ĩgũsãya dupama gasirogãrẽ wiirisũnerã dita usuyabirikuma. Judío masaka ããrĩmerãde usuyarãkuma. Abrahãrẽ dupaturi gũñaka! ĩgũ Marĩpure bũremumakũ, Marĩpu ĩgũrẽ: “Õãgũ, waja opabi ããrĩmi”, ãrĩ ĩãdi ããrĩmĩ. 10 ¿Naásũ ããrĩmakũ, Marĩpu Abrahãrẽ: “Õãgũ ããrĩmi”, ãrĩ ĩãyuri? ĩgũya dupama gasirogãrẽ wiiridero puru, ¿ĩgũrẽ irasũ ãrĩ ĩãyuri? ããrĩbea. ĩgũ irire iriburi dupuyurogueta: “Õãgũ ããrĩmi”, ãrĩ ĩãsiadi ããrĩmĩ. 11 Marĩpu ĩgũrẽ: “Õãgũ ããrĩmi”, ãrĩ ĩãdero puru, ĩgũrẽ irasũ wiiridoredi ããrĩmĩ, ĩgũyagu ããrĩrĩrẽ ĩmudoregu. Irasirigu dupuyurogue ĩgũrẽ: “Õãgũ ããrĩmi”, ãrĩ ĩãdeare diaye masĩmakũ iridi ããrĩmĩ. Sugu Abraham bũremuderosũta Marĩpure bũremumakũ, Marĩpu ĩgũrẽ: “Õãgũ ããrĩmi”, ãrĩ ĩãmi. Irasirigu Abraham ããrĩpererã Marĩpure bũremurã ñekũ ããrĩpuroridi ããrĩmĩ, ĩgũsãya dupama gasirogãrẽ wiirisũbirikerepuru.

12 ããrĩpererã ĩgũsãya dupama gasirogãrẽ wiirisũnerã Marĩpure bũremurã, diayeta Abraham parãmerã ããrĩma. Abraham irasũ wiirisũburi dupuyuro Marĩpure bũremuderosũ ĩgũsãde bũremurã, diayeta Abraham parãmerã ããrĩma.

*Marĩpu, Abraham ĩgũrẽ bũremumakũ: “Ãsũ irigũra”, ãrĩdeare gojadea*

---

\* 4:8 Sal 32.1-2

13 Marĩpu Abrahãrẽ: “I nikũrẽ murẽ, mu parãmerã ããrituriarãdere sĩgura”, ãrĩdi ããrĩmĩ. Īgũ doredeare irimakũ ĩãgũ meta irasũ ãrĩdi ããrĩmĩ. Īgũrẽ bũremumakũ: “Õãgũ ããrĩmĩ”, ãrĩ ĩãdi ããrĩmĩ. Irasirigu ĩgũrẽ: “I nikũrẽ sĩgura”, ãrĩdi ããrĩmĩ. 14 Marĩpu ĩgũ doredeare irirã direta: “Sĩgura”, ãrĩdeare sĩmakũ, marĩ ĩgũrẽ bũremurĩ wajamarĩbokuyo. Irasũ ããrĩmakũ, ĩgũ Abrahãrẽ: “Sĩgura”, ãrĩdea ubu ããrĩrĩta ããrĩyuwarikũkõãbokuyo. 15 Marĩpu Moiserẽ doreri pídeare masĩkererã, irire tarinũgãrã, wajamoãsũrãkuma. Iri doreri marĩmakũ, irire neõ tarinũgãrĩ marĩbokuyo.

16 Irasirigu Marĩpu ĩgũrẽ bũremurã direta ĩgũ Abrahãrẽ ãrĩderosũta sĩgũkumi. Īgũ doreri pídeare irirã direta: “Sĩgura”, ãrĩbirikumi. Abraham Marĩpũre bũremuderosũ bũremurãno ĩgũ parãmerã ããrituriarã ããrĩma. Irasirigu Marĩpu Abrahãrẽ ãrĩdeare ĩgũsãrẽ ããrĩpererãrẽ wajamarĩrõ sĩgũkumi. Abraham, marĩ ããrĩpererã Marĩpũre bũremurã ñekũ ããrĩdi ããrĩmĩ. 17 Marĩpu ĩgũya werenĩrĩ gojadea pũgue Abrahãrẽ ãsũ ãrĩdi ããrĩmĩ: “Murẽ wãri buri marã ñekũ ããrĩbure píbu”, ãrĩdi ããrĩmĩ. Marĩpu irasũ ãrĩmakũ pẽgu, Abraham ĩgũrẽ bũremudi ããrĩmĩ. Irasirigu Marĩpũre bũremugũ, ĩgũ ĩũrõ marĩ ñekũ ããrĩdi ããrĩmĩ. Marĩpu boanerãrẽ masũgũ ããrĩmĩ. Īgũ werenĩrĩ merã dupuyurogue marĩdeare ããrĩmakũ irimasĩmi.

18 Marĩpu Abrahãrẽ: “Mu parãmerã ããrituriarã wãrã ããrĩrãkuma”, ãrĩripoere Abraham gapũ pũrã marĩdi ããrĩmĩ. Pũrã marĩkeregu: “Marĩpu ĩgũ yũre ãrĩderosũta irigũkumi”, ãrĩ bũremudi

ãārĩmĩ. Irasirigũ Abraham wári buri marã ñekũ waadi ãārĩmĩ. <sup>19</sup> Īgũ cien bojori opakeregũ, Īgũ marãpode búro ãārĩkerekerepũ, Marĩpũre bũremusĩã: “Neõ pũrãkũbirikoa”, ãrĩ gũñabiridi ãārĩmĩ. Āsũ gapũ ãrĩ gũñadi ãārĩmĩ: “Gũare pẽrãguereta pũrãkũboadero tarikerekerepũ, Marĩpũ Īgũ yũre ãrĩderosũta irigũkumi. Yũ irire masĩã”, ãrĩdi ãārĩmĩ. <sup>20</sup> “Marĩpũ ãrĩderosũta irigũkumi”, ãrĩ bũremurĩrẽ neõ piribiridi ãārĩmĩ. Irasirigũ gũñatura, Marĩpũre bũremunemodi ãārĩmĩ. “Marĩpũ turatarigũ ãārĩmĩ”, ãrĩ, ɯɯyari sídi ãārĩmĩ. <sup>21</sup> Irasirigũ Abraham: “Marĩpũ yũre ãrĩderosũta diayeta Īgũ turari merã iriyuwarikũgũkumi. Yũ irire õãrõ masĩã”, ãrĩ bũremudi ãārĩmĩ. <sup>22</sup> Īgũ bũremumakũ, Marĩpũ Īgũrẽ: “Õãgũ ãārĩmĩ”, ãrĩ ĩãdi ãārĩmĩ.

<sup>23</sup> Irire Marĩpũya werenĩrĩ gojadea pũguere gojasũdero ãārĩbũ. Iri Abrahãyama direta gojadea meta ãārĩdero ãārĩbũ. <sup>24-25</sup> Marĩpũ Abrahãrẽ: “Õãgũ ãārĩmĩ”, ãrĩ ĩãderosũta marĩdere: “Õãrã ãārĩma”, ãrĩ ĩãburire gojadea ãārĩdero ãārĩbũ. Irasirigũ Marĩpũ, marĩ Īgũrẽ bũremumakũ, marĩdere: “Õãrã ãārĩma”, ãrĩ ĩãmi. Marĩ ñerĩ iridea waja Marĩpũ Jesũre Īgũrẽ wẽjẽmurãguere wiadi ãārĩmĩ, marĩrẽ boabosaburo, ãrĩgũ. Marĩ Opũ Jesũs boadero pũ, Marĩpũ marĩrẽ õãrã, waja opamerã ãārĩmakũ iribu, Īgũrẽ masũdi ãārĩmĩ.

## 5

### *Marĩpũ ĩũrõ waja opamerã ããrã, ãrĩ gojadea*

<sup>1</sup> Marĩ Opũre Jesucristore marĩ bũremumakũ, Marĩpũ marĩrẽ: “Õãrã, waja opamerã ãārĩma”,

ãrĩ ãĩmi. Irasirigu Marĩpu, Jesús marĩ ñerĩ iri-  
 dea waja boabosadea merã marĩrẽ ãgũ merã  
 siuñajãrĩ opamakũ iridi ããrĩmĩ. <sup>2</sup> Marĩ Jesucristo  
 buremurã, Marĩpu marĩrẽ maĩgũ merã õãrõ  
 ããrã. Pũrugue Marĩpu ãgũ irirosũ marĩrẽ õãrã  
 ããrĩmakũ irigukumi. Irasirirã gũñaturari merã,  
 õãrõ usuyari merã ãgũ õãrõ iriburire yúa. <sup>3</sup> Gajire  
 masĩa. Marĩ ñerõ tarirã, Marĩpũre marĩrẽ irita-  
 mugũrẽ gũñaturanemorãkoa. Irasirirã marĩ ñerõ  
 tarikererã, usuyamasĩa. <sup>4</sup> Marĩ ãgũrẽ gũñaturari  
 merã ñerõ tarire bokatĩũmakũ, Marĩpu marĩrẽ:  
 “Õãrõ yãma”, ãrĩgukumi. Irasirirã, ãgũ marĩrẽ  
 õãrõ iriburire gũñaturari merã yúa. <sup>5</sup> Marĩpu  
 marĩrẽ Õãgũ deyomarĩgũrẽ iriudi ããrĩmĩ marĩ  
 merã ããrĩdoregu. Irasirigu Õãgũ deyomarĩgũ merã  
 marĩrẽ ãgũ maĩrĩrẽ opatarimakũ yãmi. Irasirirã:  
 “Marĩpu marĩrẽ: ‘Õãrõ iritamugũra’, ãrĩdeare keoro  
 irigukumi”, ãrĩ masĩa.

<sup>6</sup> Marĩ basi peamegue waaburire tari-  
 masĩbirimakũ, Marĩpu marĩrẽ tauripoe ejamakũ,  
 Cristo marĩ ñerãrẽ boabosadi ããrĩmĩ. <sup>7</sup> Marĩ  
 gapũ sugũ boaboadeare boabosabirikoa, ãgũ  
 diayemarẽ irigu ããrĩkerepũ. Gajipoe irirã  
 sugũ õãgũ gapũre boabosabokoa. <sup>8</sup> Marĩpu gapũ  
 marĩ ñerã ããrĩkerepũ ãgũ marĩrẽ bure maĩrĩrẽ  
 masĩmakũ iribu, Cristore iriudi ããrĩmĩ. Irasirigu  
 Cristo marĩya ããrĩburire boabosadi ããrĩmĩ. <sup>9</sup> Cristo  
 boagũ ãgũya dí béodea merã Marĩpu marĩrẽ waja  
 opamerã ããrĩmakũ iridi ããrĩmĩ. ãgũ irasiridero  
 nemorõ ãgũ ããrĩpererã ñerãrẽ wajamoãrĩnu  
 ejamakũ, Cristo merãta marĩrẽ taugukumi. <sup>10</sup> Marĩ  
 Marĩpũre gããmemerã ããrĩkerepũ, ãgũ magũ

marĩrẽ boabosadea merã ĩgũ merã siuñajãrĩ opamakũ iridi ããrĩmĩ. ĩgũ irasiridero nemorõ Cristo marĩrẽ boabosa, dupaturi okadea merã marĩrẽ ĩgũ merã siuñajãrĩ oparãrẽ taugukumi. <sup>11</sup> I gaji ããrĩnemoa. Marĩpu, marĩ Opũ Jesucristo merã marĩrẽ ĩgũ merã siuñajãmakũ irideare gũñarã, ĩgũ merã bũro usuyãa.

*Adán, irasũ ããrĩmakũ Cristo iridea*

<sup>12</sup> ãsũ ããrã. Neõgoraguere Adán ñerĩ iripũroridi ããrĩmĩ. ĩgũ ñerĩ iridea waja boadi ããrĩmĩ. ĩgũ sugũya waja merãta ããrĩpererã ĩgũ parãmerã ããrĩturiarãde ñerĩ iri, boamurã dita ããrĩma. <sup>13</sup> Marĩpu Moisére ĩgũ doreri píburi dupuyurogueta masaka ñerĩ irisianerã ããrĩmã. ĩgũsã ñerĩ irikerepũũ iri doreri marĩmakũ, Marĩpu ĩgũsãrẽ: “Iri dorerire tarinũgãrĩ waja, waja opama”, ãrĩbiridi ããrĩmĩ dapa. <sup>14</sup> Irasũ ããrĩkerepũũ, Adán parãmerã ããrĩturiarã Moisés ããrĩdeapoegue ããrĩnerãde boanerã ããrĩmã. ĩgũsã Marĩpu doredeare Adán tarinũgãderosũ iribirikererã, ĩgũsã ñerĩ iridea waja boanerã ããrĩmã. Adán i ãmũrẽ ããrĩpũrorigũ, Marĩpu doredeare tarinũgãpũroridi ããrĩmĩ. Jesucristo gapũ i ãmũguere aarigũ, Marĩpu dorerire tarinũgãbiripũroridi ããrĩmĩ.

<sup>15</sup> Marĩ Adán tarinũgãdeare, Marĩpu marĩrẽ maĩgũ õãrõ irideare masãa. Adán sugũya waja merãta masaka ããrĩpererã boamurã dita ããrĩma. Marĩpu gapũ marĩrẽ maĩgũ, marĩrẽ taubure Jesucristore iriudi ããrĩmĩ. Irasirigũ Jesucristo sugũ ããrĩkeregũ, ããrĩpererãya ããrĩburire wajamarĩrõ

boabosadi ããrĩmĩ. Irasirigũ Marĩpũ Jesucristo merã marĩrẽ wáro õãrĩ iridi ããrĩmĩ. <sup>16</sup> Adán Marĩpũ doredeare suñarõ tarinũgãdea waja merãta ããrĩpererã masaka waja opama. Marĩ wári ñerĩ irikererũ, Marĩpũ marĩrẽ maĩgũ, wajamarĩrõ Jesucristore iriudi ããrĩmĩ, marĩ ñerõ iridea wajare taudoregũ. Irasirigũ Jesús merã marĩrẽ waja opamerã ããrĩmakũ iridi ããrĩmĩ. <sup>17</sup> Adán sugũ Marĩpũ doredeare tarinũgãdea waja merãta marĩ ããrĩpererã boamurã dita ããrã. Marĩpũ gapũ marĩrẽ burõ maĩgũ Jesucristore iriudi ããrĩmĩ, marĩrẽ boabosadoregũ. Irasirigũ Jesucristo sugũ marĩrẽ wajamarĩrõ boabosadea merã Marĩpũ marĩrẽ: “Õãrã, waja opamerã ããrĩma”, ãrĩ ããrĩ. Ìgũ irasiridero nemorõ Jesucristo merã Ìgũ irasũ ãrĩ ããrãrẽ maama okari opamakũ irigũkumi, Ìgũ turari merã Ìgũyare iriburo, ãrĩgũ.

<sup>18</sup> Adán, Marĩpũ doredeare tarinũgãdea waja merãta masaka ããrĩpererã ñerĩrẽ iriwekabejama. Irasirirã Marĩpũ wajamoãsumurã dita ããrĩma. Jesucristo diayema irigũ marĩ ñerĩ iridea waja boabosadea merã gapũ Marĩpũ marĩrẽ: “Õãrã, waja opamerã ããrĩma”, ãrĩ ããrĩ, Ìgũ merã ããrĩnikõãburo, ãrĩgũ. <sup>19</sup> Æsũ ããrã. Adán, Marĩpũ doredeare tarinũgãdea waja merãta masaka ããrĩpererã ñerĩrẽ irirã dita ããrĩma. Jesucristo Marĩpũ dorerire iridea merã ããrĩpererã Ìgũrẽ burẽmurãnorẽ waja opamerã ããrĩmakũ iridi ããrĩmĩ. Irasirigũ Marĩpũ Ìgũsãrẽ: “Õãrã ããrĩma”, ãrĩ ããrĩ.

<sup>20</sup> Marĩpũ Ìgũ dorerire pídi ããrĩmĩ, marĩrẽ iri dorerire tarinũgãrĩrẽ masĩnemomakũ iribu. Wári ñerĩ marĩ irikererũ, Marĩpũ gapũ marĩrẽ burõ

maĩgũ, marĩ ñerĩ iriro nemorõ Jesucristo merã marĩrẽ õãtariro iridi ããrĩmĩ. <sup>21</sup> Marĩ ããrĩpererã ñerĩ iridea waja boamurã dita ããrĩunanerã ããrĩbũ. Irasũ ããrĩkerepũ, Marĩpũ marĩrẽ maĩgũ, bopoñarĩ merã ããsĩã, marĩ Opũ Jesucristo boabosadea merã marĩrẽ waja opamerã ããrĩmakũ iridi ããrĩmĩ, ĩgũ pũro perebiri okarire opadoregũ.

## 6

*Cristo merã õãrõ ããrĩã, waja opamerã ããrĩrĩmarẽ gojadea*

<sup>1</sup> Marĩpũ marĩrẽ bopoñamakũ ĩãrã, ¿naásũ ãrĩrãkuri? Marĩrẽ ĩgũ bopoñanemomakũ ĩãdũarã, ¿ñerĩrẽ irinemorãkuri? <sup>2</sup> Irasũ neõ ããrĩbea. Marĩ Jesucristo marĩrẽ boabosadi merã boanerã irirosũ ããrã. Irasirirã, boanerã ñerĩrẽ neõ irinemomasĩmerã irirosũ ñerĩrẽ irinemobirikõãrõ gããmea. <sup>3</sup> Mũsã ire masĩa. Marĩ deko merã wãĩyesũrã, marĩ Jesucristoyarã ããrĩrĩrẽ ĩmubũ. Marĩ ĩgũyarã ããrĩsĩã, ĩgũ boamakũ, marĩde ĩgũ merã boanerã irirosũ waanerã ããrĩbũ. <sup>4</sup> Marĩ wãĩyesũrã, ĩgũ boadero pũrũ yãasũmakũ, marĩde ĩgũ merã yãasũnerã irirosũ waanerã ããrĩbũ. Marĩpũ ãmũgasigue ããrĩgũ ĩgũ turari merã ĩgũrẽ masãgũ, marĩdere ĩgũ merã masãnerã irirosũ ããrĩmakũ iridi ããrĩmĩ, ĩgũ merã maama okarire opaburo, ãrĩgũ.

<sup>5</sup> Marĩ Cristoyarã ããrĩsĩã, ĩgũ boaderosũta marĩde ĩgũ merã boanerã irirosũ waanerã ããrĩbũ. Irasirirã, ĩgũ boadigue masãderosũta marĩde masãrãkoa. <sup>6</sup> ĩsũ masĩa. Cristo curusague boamakũ, marĩ ñerĩ direta iririkũnerã ĩgũ merã curusague boanerã irirosũ waanerã ããrĩbũ. Irasiriro marĩ ñerĩrẽ ãaribejari, marĩrẽ

tarinugãmasĩbirikoa pama. <sup>7</sup> Masaka boadero p̄m̄, ãgũsã ñerĩ iririkũre neõ irinemobirikuma.

<sup>8</sup> Marĩ Cristo merã boanerã irirosũ ããrĩrã: “Ígũ merã õãrõ ããrĩnkõãrãkoa”, ãrĩ b̄remua. <sup>9</sup> Idere õãrõ masĩa. Cristo boadero p̄m̄, Marĩp̄m̄ ãgũrẽ masũ, dupaturi okamakũ iridi ããrĩmĩ. Irasingũ Cristo dupaturi neõ boabirikumi pama. Boari neõ dupaturi ãgũrẽ tarinugãmasĩbirikoa. <sup>10</sup> Ígũ suñarõta boari merã marĩ ñerĩ iridea wajare boa, wajaripeokõadi ããrĩmĩ. Ígũ boadero p̄m̄, Marĩp̄m̄ ãgũrẽ masũ, dupaturi okamakũ iridi ããrĩmĩ. Ígũrẽ masũ, dupaturi okamakũ iridero p̄m̄, Marĩp̄m̄ gããmerõsũta irigũ Marĩp̄m̄ merã õãrõ ããrĩnkõãmi. <sup>11</sup> Irasingũ ãsũ ãrĩ gũñaka! “Gua Op̄m̄ Jesucristo merã gua boanerã irirosũ ããrĩsĩã, gua ñerĩrẽ iriunaderosũ irinemobirikoa”, ãrĩ gũñaka! “Irasingũ ãgũyarã ããrĩsĩã, Marĩp̄m̄ gããmerõsũta iri, ãgũ merã õãrõ ããrĩnkõãrã!” ãrĩ gũñaka!

<sup>12</sup> Irasingũ ãsũ dup̄m̄ boaburi dup̄m̄ merã ñerĩrẽ neõ irinemobirikõãka, ãsũ ñerĩrẽ ãaribejari ãsũrẽ tarinugãbirikõãburo, ãrĩrã! <sup>13</sup> ãsũ mojõrĩ, ãsũ gũñarĩ, ããrĩpereri ãsũ dup̄m̄ ããrĩrĩ merã ñerĩrẽ iribirikõãka! ãsũ Cristo merã boanerã dupaturi okarã irirosũ ããrã. Irasingũ ãsũ gap̄m̄ irika! ããrĩpereri ãsũ dup̄m̄ ããrĩrĩrẽ Marĩp̄m̄re wiaka, ãgũ gããmerõsũta õãrĩ diretta irimurã! <sup>14</sup> Marĩ irire irasingũ, marĩ ñerĩ iridũari marĩrẽ tarinugãmasĩbirikoa. Marĩp̄m̄ marĩrẽ: “Ȳm̄ Moisére doreri pídeare iribirimakũ, ãsũrẽ béogura”, ãrĩbemi. ãsũ gap̄m̄ marĩrẽ yãmi. Ígũ marĩrẽ ããrĩsĩã, marĩrẽ iritamumi, ãgũ doredeare iriburo, ãrĩgũ.

*Marĩ, Cristore moãboerã ããrĩrĩmarẽ gojadea*

<sup>15</sup> Marĩpu marĩrẽ maĩmakũ ããrĩrĩ: “Marĩ, Marĩpu doreri pĩdea merã ããrĩbea. Irasirirã ñerĩrẽ irirã!” ¿ãrĩrĩ? Irire neõ ãrĩbirikõãrã! <sup>16</sup> Mũsã ire õãrõ masĩa. Marĩ sugũ dorerire irirã, ãgũyarã ãgũrẽ moãboerã ããrĩrĩkoa. ãgũ marĩ opu ããrĩgũkumi. Iri irirosũta marĩ ñerĩ iridũari, marĩ opu, marĩrẽ doregũ irirosũ ããrĩrokoa. Irasirirã marĩ ñerĩ iririre pirimerã, Marĩpu merã perebiri okari bokabirikoã. ãgũ doreri gapure irirã ãgũrẽ moãboerã diayemarẽ irinĩrĩkoa. <sup>17-18</sup> Iripoegue ñerĩ iridoregũyarã ãgũrẽ moãboerã irirosũ mũsã ñerĩ iridũarire irinerã ããrĩbũ. Marĩpu mũsãrẽ ãgũya buerire pẽmasĩmakũ iridero purũ, ãgũ doreri gapure mũsã õãrõ iritũyãã. Irasirirã ñerĩ iridoregũyarã ãgũrẽ moãboerã irirosũ neõ ããrĩbea pama. ãgũrẽ wirinerã irirosũ ããrĩrã, Marĩpure moãboerã ñãjãnerã ããrã, diayema gapure irimurã. Irasirirã irire gũñarã: “Mũ gũare irasirideã õãtaria”, ãrĩ, usũyari sĩa ãgũrẽ! <sup>19</sup> Yũ ire mũsãrẽ pẽmasĩmakũ gããmegũ, masaka ãgũsã gũñarĩ merã wererosũ wereã. Iripoegue ããrĩpereri mũsãya dupugue ããrĩrĩ merã ãmũrikũ ñerĩ direta irinĩkõãnerã ããrĩbũ. Daporare ããrĩpereri mũsãya dupugue ããrĩrĩrẽ Marĩpure wiaka, ãgũrẽ moãboerã diayema direta irimurã! Irasirirã ãgũ gããmerĩ direta iririkũrãkoa.

<sup>20</sup> Iripoegue mũsã ñerĩ iridũari direta irirã, Marĩpure moãboerã ãgũ gããmerĩ direta iriro gããmekoã, ãrĩbirinerã ããrĩbũ. <sup>21</sup> Mũsã ñerĩrẽ irasirirã, ¿ñeeno õãrĩrẽ bokari? Dapora mũsã ñerĩ iriunadeare gũñarã, bũro gũyasĩrĩa. Iri ñerĩrẽ mũsã irideã waja perebiri peamegue waabokuyo.

<sup>22</sup> Iripoegue marĩ ñerĩ direta iridoregure moãboerã irirosũ ããrĩunanerã ããrĩbú. Daporare Marĩpũ marĩrẽ wiudero pũũ, ãgũrẽ moãboerã ããrã. Irasirirã ãgũ gããmerĩrẽ iriwãgãrã, ãgũ pũro perebiri okarire opamurã ããrã. <sup>23</sup> Ñerĩ irirãno, ãgũsã ñerĩ iriri waja, perebiri peamegue waarĩre wajatarãkuma. Marĩpũ, marĩ Opũ Jesucristore bũremurã garũre wajamarĩrõ ãgũ pũro perebiri okari opaburire sãgũkumi.

## 7

### *Mojõsiarima keori merã weredeã*

<sup>1</sup> Yaarã, mũsã Marĩpũ Moisére doreri pídeare õãrõ masĩa. Sugũ masakũ ãgũ okarinãrĩ direta iri dorerire irimasĩmi. <sup>2</sup> Marĩpũ doreri pídea ãsũ ãrã. Sugo nomeõ igo mojõsiadero pũũ, igo marãpũ okaripoere igo ãgũ merã ããrĩnĩkõãkumo. ãgũ boamakũ, igo marãpũ dagũ merã ããrĩdea perekoa. Gajigũ merã mojõsiamasĩkumo doja. <sup>3</sup> Igo marãpũ okakerepũũ gajigũ merã marãpũkũgo, ãgũ merã ñerõ irigo Marĩpũ dorerire tarinũgãgõ irikumõ. Igo marãpũ boadero pũũgue dita gajigũ merã marãpũkũmasĩkumo. Irasirigo ãgũ merã ñerõ irigo meta irikumõ. Marĩpũ dorerire tarinũgãbirikumõ.

<sup>4</sup> Yaarã, mũsãde ãsũta ããrã. Iripoegue Marĩpũ Moisére doreri pídea merã ããrĩnerã ããrĩbú. Jesucristo boamakũ, ãgũ merã boanerã irirosũ ããrĩsĩa, daporare iri doreri pídea merã ããrĩbea. Jesucristo boa, masãrĩ merã Marĩpũ marĩrẽ ãgũyarã ããrĩmakũ iridi ããrĩmĩ, ãgũ gããmerĩrẽ iriburo, ãrĩgũ. <sup>5</sup> Iripoeguere marĩ ñerĩrẽ ãaribejari direta iriunanerã ããrĩbú. Marĩpũ

Moisére doreri pídeare masídero pɯɯ, iri dorerire tarinɯgã, ããrĩpereri marĩya dupama merã ñerĩẽ ɯaribejanemonerã ããrĩbú. Irasirirã perebiri peamegue waamurã dita ããrĩnerã ããrĩbú. <sup>6</sup> Daporare pama marĩ Cristo merã boanerã irirosũ ããrĩsĩã, Marĩpɯ Moisére doreri pídea merã ããrĩbea. Irire tariwerenerãgue ããrã. Irasirigɯ Marĩpɯ, Ōãgũ deyomarĩgũ merã marĩrẽ maama okarire opamakũ yámi, Ĩgũ gããmerĩrẽ iridoregɯ.

*Marĩrẽ ñerĩ irimakã iriri marĩguere ããrĩrmarẽ weredea*

<sup>7</sup> Irasirirã, Marĩpɯ Moisére doreri pídeare: “Ñegoráa”, ¿ãrĩrãkuri? Neõ irasũ ãrĩbirikõãrã! Irita yɯ ñerĩ iririkurire masĩmakũ iribɯ. Iri doreri pídea ãsũ ãrã. “Gajerãyare bɯro ɯaribejabirikõãka!” Irasirigɯ, iri doreri marĩmakũ, yɯ gajerãyare ɯaribejarire masĩbiribokuyo. <sup>8</sup> Iri doreri: “Ãsũ iribirikõãka!” ãrĩdeare masídero pɯɯ, iri yɯre ããrĩpereri ñerĩrẽ ɯaribejamakũ iribɯ. Iri doreri marĩmakũ: “Irire tarinɯgãgũ irikoa”, ãrĩmasĩbiribokuyo. <sup>9</sup> Yɯ iri dorerire masĩburi dupuyuro: “Yɯ, Marĩpɯ merã õãrõ ããrĩkõãgũ irikoa”, ãrĩ gũñadibɯ. Iri dorerire masídero pɯɯ, irire tarinɯgãgũ: “Ñerõ irigɯ irikoa, Marĩpɯ merã õãrõ ããrĩbirikoa”, ãrĩ masĩbɯ pama. <sup>10</sup> Marĩ iri dorerire irirã, Marĩpɯ merã õãrõ ããrĩkõãboko. Yɯ gapɯ irire iripeomasĩbirisĩã, ñerĩ iridea waja, waja opagɯ, perebiri peamegue waabodi dujabɯ. <sup>11</sup> “Marĩpɯ dorerire irigɯ, Ĩgũ merã õãrõ ããrĩkõãgũ irikoa”, ãrĩ gũñakerepuru, yɯ ñerĩ ɯaribejari, yɯre Marĩpɯ dorerire tarinɯgãmakũ iribɯ. Irasirigɯ iri

dorerire tarinugāsīā, ñerĩ iridea waja, waja opagũ peamegue waabodi dujabũ.

12 Irasũ āārĩkerepũ, Marĩpũ Moisére doreri pídea õārĩ āārã. Diayema doreri āārã. Marĩpũ irire pídi āārĩmĩ marĩrẽ iritamubu. 13 Iro tamerãrẽ Marĩpũ doreri õārĩ āārĩkerero, ¿marĩrẽ peamegue waabonerã dujamakũ irikuri? Neõ irasũ āārĩbirikoa. Marĩ ñerĩ iriri gapũ marĩrẽ peamegue waabonerã dujamakũ iribũ. Irasiro Marĩpũ ĩgũ õārĩ doreri pídea merã marĩ ñerõ iririre: “Ñegorã”, ārĩ masĩsũa.

14 Ire masĩa marĩ. Marĩpũ ĩgũ dorerire Õãgũ deyomarĩgũ merã Moisére pídi āārĩmĩ. Irasiro õārĩ dita āārã. Marĩ gapũ marĩ ñerĩrẽ ùaribejari merã ñerĩ iridoregure duasũnerã irirosũ āārã. Irasirirã ñerĩrẽ iririkũrã āārã. 15 Õārĩrẽ iridũakererã, iribea. Ñerĩrẽ iridũabirikererã, irinĩkõãa. Marĩ irasiririre pémasĩbea. 16 “Ñerĩrẽ iridũabirikoa”, ārĩkererã, irikõãa. Irasirikererã: “Ñerĩrẽ iridũabirikoa”, ārĩrã, Marĩpũ dorerire: “Õārĩ āārã”, ārĩ masĩa. 17 “Marĩ ñerĩrẽ dupaturi iribea pama”, ārĩkererã, ñerĩrẽ irirã, marĩ basi meta irire yáa. Marĩguere ñerĩ āārĩrĩ gapũ marĩrẽ irire irimakũ yáa. 18 Marĩ ñerĩrẽ ùaribejari merã ñerĩ direta irirã yáa. Irasirirã: “Marĩguere õārĩ máa”, ārĩ masĩa. Marĩ õārĩrẽ iridũakererã, bokatĩũbea. 19 Marĩ õārĩ iridũakererã, iribea. Ñerĩ iridũabirikererã, iri gapũre yáa. 20 Irasirirã marĩ basi: “Ñerĩrẽ dupaturi iribirikoa”, ārĩkererã, irikõãa doja. Marĩguere ñerĩ āārĩrĩ gapũ marĩrẽ irire irimakũ yáa.

21 Irasiro ãsũ waáa marĩrẽ. Õārĩrẽ marĩ

iridɯakerepɯɯ, marĩguere ñerĩ ããrĩrĩ marĩrẽ ñerĩ direta irimakũ yáa. <sup>22</sup> Marĩ basi marĩ gũñarĩgue: “Marĩpɯ dorerire iridɯakoa”, ãrĩ gũñáa. <sup>23</sup> Iri dorerire iridɯakerepɯɯ, marĩ ñerĩ iridɯari gapɯ marĩ gũñarĩgue òãrĩ iridɯarire tarinugãa. Irasirirã marĩ basi iri ñerĩ iridɯarire tarinugãmasĩbea.

<sup>24</sup> Marĩ basi ñerĩ iridɯarire tarinugãmasĩmerã, buro bujawereri merã: “¿Noã marĩrẽ ñerĩ iridea wajare taugukuri, Marĩpɯ merã òãrõ ããrĩburo, ãrĩgũ?” ãrĩ gũñáa. <sup>25</sup> Marĩpɯ dita Jesucristo marĩ Opɯ merã marĩrẽ taumasĩmi. Irasirirã Marĩpɯre: “Õãtaria mu”, ãrĩ, usuyari sĩa. Irasirirã marĩ gũñarĩgue: “Marĩpɯ dorerire iridɯakoa”, ãrĩ gũñáa. “Gɯa Opɯ ããrã mu”, ãrã ĩgũrẽ. Marĩ irasũ ãrĩkerepɯɯ, marĩ ñerĩrẽ ɯaribejari, marĩrẽ ñerĩrẽ iridoregɯ irirosũ ããrĩkõãa dapa.

## 8

*Õãgũ deyomarĩgũ iritamurĩ merã òãrõ ããrĩrĩmarẽ gojadea*

<sup>1</sup> Dapora Marĩpɯ marĩrẽ Jesucristoyarãrẽ ñerĩrẽ ɯaribejarire piri, Õãgũ deyomarĩgũ dorerosũ irirãrẽ: “Wajamoãgɯra”, ãrĩrĩno neõ máa. <sup>2</sup> Õãgũ deyomarĩgũ, marĩ Jesucristoyarã ĩgũ dorerosũ irimakũ, marĩ ñerĩ iririkurire pirimakũ yámi. Irasirigɯ marĩrẽ, perebiri peamegue waabonerãrẽ Marĩpɯ merã òãrõ ããrĩmakũ yámi. <sup>3</sup> Marĩ ñerĩ iriri direta ɯaribejasĩa, Marĩpɯ Moisére doreri pídeare neõ iripeomasĩbirinerã ããrĩbú. Irasirigɯ Marĩpɯ gapɯ ĩgũ magũrẽ iriudi ããrĩmĩ, marĩ ñerĩ iridea wajare boa, wajaribosadoregu. ĩgũ ñerĩrẽ iribirikeregɯ, marĩ ñerĩ iridea waja, waja

oparã irirosũ dupukũgũ, marĩrẽ boabosadi ããrĩmĩ, marĩ ñerĩ iridea waja oparire wajarigũ. <sup>4</sup> Marĩpũ, marĩrẽ ãgũ dorerire iriburo, ãrĩgũ, irasiridi ããrĩmĩ. Irasirirã marĩ ñerĩ iririre Ɂaribejabea. Õãgũ deyomarĩgũ dorerosũ irirã yáa.

<sup>5</sup> Ñerĩ iririre Ɂaribejarã, iri direta gũña, iridũama. Õãgũ deyomarĩgũ dorerosũ irirã gapũ, ãgũ gããmerĩ direta gũña, iridũama. <sup>6</sup> Ñerĩ direta gũña, iridũarã, perebiri peamegue waarãkuma. Õãgũ deyomarĩgũ gããmerĩ direta gũña, iridũarã gapũ Marĩpũ merã perebiri okari oparãkuma. Irasirirã siuñajãrĩ merã ããrĩrãkuma. <sup>7</sup> Ñerĩ direta gũña, iridũarã, Marĩpũre ãaturirã ããrĩma. ãgũ dorerire iridũabiri, irire neõ irimasĩbema. <sup>8</sup> Irasirirã ñerĩ iriri direta Ɂaribejarã, Marĩpũre ɁɁyamakũ irimasĩbema.

<sup>9</sup> Musã gapũ ñerĩ iriri direta Ɂaribejabea. Õãgũ deyomarĩgũ musãguere ããrĩmi. Irasirirã ãgũ turari merã ãgũ dorerosũ yáa. Õãgũ deyomarĩgũrẽ opamerã gapũ, Cristoyarã ããrĩbema. <sup>10</sup> Marĩ ñerõ iridea waja marĩya dupũ boaburi dupũ ããrĩkerepũ, Cristo marĩguere ããrĩmakũ, Marĩpũ marĩrẽ: “Õãrã, waja opamerã ããrĩma”, ãrĩ ããmi. Irasiriro marĩya dupũ boakerepũ, marĩya yũpũrã Ɂmũgasigue okanĩkõãrokoa. <sup>11</sup> Marĩpũ, Õãgũ deyomarĩgũ merã Jesucristore boadiguere masũ, dupaturi okamakũ iridi ããrĩmĩ. Õãgũ deyomarĩgũ marĩguere ããrĩmakũ, Marĩpũ Jesucristore masũdita marĩya dupũ boadero pũ, marĩdere masũ, maama okari opamakũ irigũkumi.

<sup>12</sup> Yaarã: “Marĩpũ marĩrẽ irasũta irigũkumi”, ãrĩ

masĩrã, ñerĩ iririre ɯaribejabirikõãrã! <sup>13</sup> Ñerĩ iriri direta ɯaribejarã, perebiri peamegue waarãkoa. Õãgũ deyomarĩgũ turari merã marĩ ñerĩrẽ ɯaribejarire pirirã, Marĩɸ merã perebiri okarire oparãkoa.

<sup>14</sup> Õãgũ deyomarĩgũ dorerosũ irirãno, Marĩɸ pũrã ããĩma. <sup>15</sup> Marĩɸ marĩrẽ Õãgũ deyomarĩgũrẽ iriudi ããĩmĩ. Ĩgũ marĩrẽ Marĩɸ pũrã ããĩmakũ yámi. Ĩgũ merã Marĩɸ marĩrẽ wajamoãburire güiderosũ dupaturi güibea. Irasirirã Ĩgũ iritamurĩ merã güiro marĩrõ Marĩɸre: “Yɸɸ”, ãrĩ masĩa.

<sup>16</sup> Õãgũ deyomarĩgũ marĩ gũñarĩgue marĩrẽ: “Diayeta Marĩɸ pũrã ããrã”, ãrĩ masĩmakũ yámi.

<sup>17</sup> Irasirirã marĩ Ĩgũ pũrã ããĩsĩã: “Ããĩpererire yɸ pũrãrẽ sĩgura”, ãrĩdeare Cristo merã irire oparãkoa. Marĩ Cristoyarã ããĩsĩã, Ĩgũ i ãmũgue ñerõ tariderosũ marĩde ñerõ tarikererã, ɸɸgue ãmũgasigue Ĩgũ ããĩrõsũta Ĩgũ merã õãrõ ããĩrãkoa.

<sup>18</sup> Dapora marĩ i ãmũgue ñerõ tarikererã, ɸɸgue ãmũgasigue Marĩɸ marĩrẽ õãrĩ sĩburire gũñarã: “Buro ñerõ taribea”, ãrĩ masĩa. <sup>19</sup> Sunɸ Marĩɸ marĩrẽ: “Ĩsã yɸ pũrã ããĩma”, ãrĩ, õãrĩrẽ sĩgukumi. Ĩgũ marĩrẽ sĩburire ããĩpereri Ĩgũ i ãmũma iridea, masaka gajinorẽ buro ããdɸarã irirosũ yũro yáa.

<sup>20</sup> Iripoegue Adán ñerĩrẽ iriɸroridea waja i ãmũma poyakõãdero ããĩbú. Iri gããmerõ poyabiridero ããĩbú. Marĩɸ dorederosũ poyadero ããĩbú. Irasirikeregɸ, ɸɸgue õãrĩ gorawayugukumi. <sup>21</sup> Irasirigu Marĩɸ, i ãmũma boapereburi ããĩkereɸɸ, marĩrẽ Ĩgũ pũrãrẽ

õãrã gorawayurosũ, i ãmãma ããrĩpererire õãrĩ dita gorawayugukumi doja. <sup>22</sup> Ire marĩ masĩa. Adán ñerĩrẽ iripũroridero pũru, daporaguedere ããrĩpereri i ãmãma Marĩpu iridea, nomeõ majĩgũ nijĩwãgũgõ pũrĩsũrõsũ ããrã. <sup>23</sup> I ãgũ iridea irirosũta marĩde poyari merã ããrã. Marĩ ãgũyarã ããrĩnũgãmakũ, Õãgũ deyomarĩgũrẽ marĩrẽ sĩdi ããrĩmĩ. Daporare bũro ñerõ tarikererã, pũrugue ãgũ marĩrẽ: “Yũ pũrã ããrĩma”, ãrĩ, boabiri dupũre maama dupũre sĩburire usũyari merã yúa. <sup>24</sup> “Marĩpu marĩrẽ: ‘Taugũra’, ãrĩderosũta taugũkumi”, ãrĩ yúmasĩa. ãgũ marĩrẽ taudero pũru, marĩ irire yúderosũ neõ yúnemobirikoa. <sup>25</sup> Marĩ gajinorẽ ããbirikererã gũñaturari merã: “ããrãkoa”, ãrĩ yúrosũ, Marĩpu pũrugue ãgũ marĩrẽ tauburire gũñaturari merã yúro gããmea.

<sup>26</sup> Marĩ Marĩpũre: “¿Naásũ sãrẽrõ gããmerĩ?” ãrĩ masĩbirimakũ, Õãgũ deyomarĩgũ marĩrẽ iritamumi. Irasirigu, marĩ Marĩpũre keoro sãrẽmasĩbirimakũ, Õãgũ deyomarĩgũ marĩya ããrĩburire Marĩpũre õãrõ sãrẽbosami. Masaka werenĩrõsũ sãrẽbemi. Marĩrẽ bũro bopoñarĩ merã, õãrõ masĩrĩ merã sãrẽbosami. <sup>27</sup> Marĩpu gããmerõsũta Õãgũ deyomarĩgũ marĩ ãgũyarã ããrĩburire sãrẽbosami. Irasirigu Marĩpu, ããrĩpereri marĩ gũñarĩrẽ masĩpeogu, Õãgũ deyomarĩgũ marĩrẽ sãrẽbosaridere õãrõ masĩmi.

*Jesucristo turari merã ñerĩrẽ tarĩnũgãmasĩa, ãrĩ gojadea*

<sup>28</sup> Idere marĩ masĩa. Marĩpu ãgũ gããmederosũta marĩrẽ beyedi ããrĩmĩ. Irasirigu ããrĩpereri marĩrẽ ãgũrẽ maĩrãrẽ waaburire ãmumi õãrĩ direta

iribu. <sup>29</sup> Neōgoragueta Marīpɥ marīrē īgūyarā āārīmurārē masīsiadi āārīmí. Marī neō deyoaburo dupuyurogueta beyesiadi āārīmí, marīrē īgū magū irirosū āārīburo, ārīgū. Irasirigɥ īgū magū marī tīgū āārīmi. Marī īgū pagupūrā wārā āārā. <sup>30</sup> Neōgoragueta Marīpɥ īgūyarā āārīmurārē: “Yɥ pūrā āārīma”, ārī beyesiadi āārīmí. Irasirigɥ marīrē īgū beyenerārē Jesúre bɥremunɥgādoɥeɥ siiu: “Ōārā, waja opamerā āārīma”, ārī īāmi. īgū marīrē irasū ārī īārārē ũmɥgasigue īgū āārīrōsūta īgū merā ōārō āārīmakū irigɥkumi.

<sup>31</sup> Marī irire masīrā, ɥnaásū ārīrī? Āsū ārā. Marīpɥ marīrē iritamumakū, gajerā marīrē īāturikererā, neō poyanorēmasībema. <sup>32</sup> Marīpɥ marī ñerī iridea waja boabosabure īgū magū Jesucristore iriudi āārīmí. “Yɥ magūrē maīsīā, iriubea”, ārībiridi āārīmí. Irasirigɥ īgū magūrē iriudi āārīsīā, āārīpereri marīya āārīburire ōārī direta sigɥkumi. <sup>33</sup> Marīpɥ marīrē īgū beyenerārē: “Ōārā, waja opamerā āārīma”, ārī īāmakū, gajerā marīrē: “Ñerā āārīma”, neō ārī weresāmasībema.

<sup>34</sup> Cristo marī ñerī iridea wajare boabosa, masā, ũmɥgasigue mɥrīadi āārīmí. Irasirigɥ Marīpɥ diaye gapɥ doami. Marīya āārīburire sērēbosaníkōāmi. Irasirirā gajerā Marīpɥre marīrē: “Īsā ñerī iridea waja īgūsārē wajamoāka!” neō ārīmasībema. <sup>35</sup> Cristo marīrē bɥro maīmakū, gajerā īgūrē: “Neō maīnemobirikōāka īgūsārē!” ārīmasībirikuma. Marī ñerō tarikerepɥɥ, marī diasaro péñakerepɥɥ, gajerā marīrē ñerō irikerepɥɥ, marī ɥaboakerepɥɥ, surí marīrā āārīkerepɥɥ, goero marīrē āārīkerepɥɥ, gajerā

marĩrẽ wẽjẽkerekerepũ, Cristo marĩrẽ maĩgũ marĩ merã ããrĩnĩkõãmi. Īgũ marĩrẽ maĩrĩrẽ neõ piribirikumi. <sup>36</sup> Marĩpũya werenĩrĩ gojadea pũgue marĩ waaburire ãsũ ãrĩ gojasũdero ããrĩbũ:

Gũa mũyarã ããrĩrĩ waja gajerã gũare ãmũrikũ wẽjẽdũanĩkõãma. Ovejare wẽjẽmurã wẽjẽrõgue ãĩãrã irirosũ gũare yãma, ãrĩ gojasũdero ããrĩbũ.✧

<sup>37</sup> Marĩ gapũ ñerõ tarikererã, Cristo marĩrẽ maĩgũ iritamurĩ merã, marĩ ããrĩpereri ñerĩrẽ tarinũgãa. Irasirirã ĩgũ merãta gũñaturanemoa.

<sup>38</sup> Irasirigũ ire õãrõ masĩa. Marĩpũ marĩrẽ bũro maĩmi. Marĩ Opũre Jesucristore iriugũ, ĩgũ marĩrẽ maĩrĩrẽ masĩmakũ iridi ããrĩmĩ. Marĩ boamakũ, o marĩ yoaripoe okamakũ, marĩrẽ maĩgũ marĩ merã ããrĩnĩkõãmi. Marĩpũre wereboerã, masaka oparã, wãtẽa oparãde Marĩpũre marĩrẽ maĩrĩrẽ pirimakũ irimasĩbema. Marĩrẽ gajino irimakũ, Marĩpũ marĩrẽ maĩgũ marĩ merã ããrĩmi. Daporama ããrĩrĩ, pũrũma ããrĩburide Marĩpũre marĩrẽ maĩrĩrẽ pirimakũ irimasĩbirikoa. <sup>39</sup> Marĩ ãmarõgue waamakũ, o ãkũãrõgue waamakũ, marĩrẽ maĩgũ marĩ merã ããrĩmi. Gajinode Marĩpũ iridea ããrã. Irasiriro iride ĩgũrẽ marĩrẽ maĩrĩrẽ pirimakũ irimasĩbea. Marĩrẽ marĩ Opũ Jesucristoyarãrẽ ĩgũ marĩrẽ neõ perebirikoa.

## 9

*Israel bumarã Marĩpũ beyenerã ããrĩma, ãrĩ gojadea*

---

✧ 8:36 Sal 44.22

1 Y<sub>u</sub>, Cristore b<sub>u</sub>remug<sub>u</sub> ããrĩg<sub>u</sub>, diayeta werea m<sub>u</sub>sãr<sub>e</sub>. ãrĩgatobea. Õãg<sub>u</sub> deyomarĩg<sub>u</sub>de y<sub>u</sub> merã ããrĩg<sub>u</sub>, y<sub>u</sub> ãrĩrĩr<sub>e</sub>: “Diayeta ããrã”, ãrĩ masĩmak<sub>u</sub> yãmi. 2 Yaarã Israel bumarã Cristore b<sub>u</sub>remubirimak<sub>u</sub> ããg<sub>u</sub>, b<sub>u</sub>ro b<sub>u</sub>jawereri merã g<sub>u</sub>ñarik<sub>u</sub>a. 3 Ìg<sub>u</sub>sã Ìg<sub>u</sub>r<sub>e</sub> b<sub>u</sub>remumak<sub>u</sub> gããmeg<sub>u</sub>, y<sub>u</sub> gap<sub>u</sub> gorawayud<sub>u</sub>adãa: “Perebiri peamegue wajamoãs<sub>u</sub>bokuma”, ãrĩg<sub>u</sub>. Y<sub>u</sub> Ìg<sub>u</sub>sãr<sub>e</sub> irasiribosag<sub>u</sub> Cristore dukawarinugãjag<sub>u</sub>, Ìg<sub>u</sub>r<sub>e</sub> neõ dupaturi ãnemobiribokoa. 4 Ìg<sub>u</sub>sã, Israel parãmerã ããrĩturiarã ããrĩma. Marĩp<sub>u</sub> Ìg<sub>u</sub>sãr<sub>e</sub>: “Y<sub>u</sub> p<sub>u</sub>rã ããrã”, ãrĩdi ããrĩmĩ. Ìg<sub>u</sub> gosewasiriri merã Ìg<sub>u</sub>sã watope ããrĩdi ããrĩmĩ. Ìg<sub>u</sub>sãr<sub>e</sub>: “Y<sub>u</sub>, m<sub>u</sub>sã Op<sub>u</sub> ããrã. M<sub>u</sub>sã, yaarã ããrã”, ãrĩdi ããrĩmĩ. Ìg<sub>u</sub>sãr<sub>e</sub> Ìg<sub>u</sub> dorerire masĩburo, ãrĩg<sub>u</sub>, Moisére irire pídi ããrĩmĩ. “Yaa wiigue y<sub>u</sub>re b<sub>u</sub>remurã, ãs<sub>u</sub> irika!” ãrĩ pídi ããrĩmĩ. “M<sub>u</sub>sã parãmerã ããrĩturiarãr<sub>e</sub> õãrõ iritamug<sub>u</sub>ra”, ãrĩdi ããrĩmĩ. 5 Israel p<sub>u</sub>rã pe mojõma pere su gubu peru p<sub>e</sub>r<sub>e</sub>bejarãgora, g<sub>u</sub>a ñek<sub>u</sub>sãmarã ããrĩnerã ããrĩmã. Cristode marĩ iriros<sub>u</sub> dupakug<sub>u</sub> deyoag<sub>u</sub> Ìg<sub>u</sub>sã parãmi ããrĩturiag<sub>u</sub>, Israel bumata ããrĩdi ããrĩmĩ. Ìg<sub>u</sub> ããrĩpererã, ããrĩpereri Op<sub>u</sub> ããrĩmĩ. Irasirirã Ìg<sub>u</sub>r<sub>e</sub>: “Õãtaria m<sub>u</sub>”, ãrĩ, usuyari s<sub>u</sub>nĩrã! Iras<sub>u</sub>ta irirã!

6 Israel bumarã ããrĩpererã diayeta Marĩp<sub>u</sub>yarãgora ããrĩbema. Irasirig<sub>u</sub> Marĩp<sub>u</sub> Israel bumarãr<sub>e</sub>: “Yaarãr<sub>e</sub> ãs<sub>u</sub> irig<sub>u</sub>ra”, ãrĩdeare Ìg<sub>u</sub>sãr<sub>e</sub> ããrĩpererãr<sub>e</sub> iribirimak<sub>u</sub> ããg<sub>u</sub>: “Marĩp<sub>u</sub> Ìg<sub>u</sub> ãrĩderos<sub>u</sub>ta iribemi”, ãrĩ g<sub>u</sub>ñabea y<sub>u</sub>. 7 Israel bumarã, Ìg<sub>u</sub>sã ñek<sub>u</sub> Abraham parãmerã ããrĩturiarã ããrĩkerep<sub>u</sub>ru, Marĩp<sub>u</sub> Ìg<sub>u</sub>sãr<sub>e</sub> ããrĩpererãr<sub>e</sub>: “Diayeta y<sub>u</sub> p<sub>u</sub>rã ããrĩma”, ãrĩ ããbemi. Irasirig<sub>u</sub> Abrahãr<sub>e</sub>:

“M̄ magũ Isaac parãmerã ããrĩturiarã dita diayeta m̄ parãmerã ããrĩturiarã ããrĩrãkuma”, ãrĩdi ããrĩmĩ. 8-9 Marĩp̄ Abrahãrẽ ĩgũ magũ Isaac deyoaburire weregũ, ãsũ ãrĩdi ããrĩmĩ: “Gaji bojori ipapoeta aarigura doja. Iripoeta m̄ marãpo Sara majĩgũrẽ pũrãkugokumo”, ãrĩdi ããrĩmĩ. Irasirigũ Marĩp̄ ãrĩderosũta Abraham magũ deyoadi ããrĩmĩ. Irasirirã marĩ ire masĩa. Abraham parãmerã deyoaturiawãgãrã ããrĩpererã Marĩp̄ pũrã ããrĩbema. Marĩp̄ ãrĩdeare b̄remurã dita diayeta Abraham parãmerã ããrĩturiarã, Marĩp̄ pũrã ããrĩma.

10 Gaji ãsũ ããrã. Isaac, Rebeca merã marãpokadero p̄rũ, igo ũma pẽrãgue pũrãkudeo ããrĩmó. ĩgũsã pagũ Isaac, gũ ñekũ ããrĩdi ããrĩmĩ. 11-13 ĩgũ pũrã deyoaburi dupuyuro, ĩgũsã õãrĩrẽ, o ñerĩrẽ iriburi dupuyuro Marĩp̄ ĩgũsã pago ããrĩbore ãsũ ãrĩdi ããrĩmĩ: “Ĩgũ tĩgũ ĩgũ pagumãrẽ moãboegukumi”, ãrĩdi ããrĩmĩ. ĩgũ igore irire ãrĩderosũta ĩgũya werenĩrĩ gojadea pũgue ãsũ ãrĩ gojasũdero ããrĩbũ: “Jacore beyebũ. Esaú gapure beyebiribũ”, ãrĩ gojasũdero ããrĩbũ. Irasirigũ Marĩp̄ Jacore beyederosũta ĩgũyarã ããrĩmurãrẽ beyegũ, ĩgũsã gajino iriburi dupuyuro ĩgũ gããmederosũta ĩgũsãrẽ: “Yaarã ããrĩma”, ãrĩdi ããrĩmĩ.

14 Irire pẽrã, ¿naásũ gapũ ãrĩrãkuri marĩ? “Sugũ gajino iriburi dupuyuro Marĩp̄ ĩgũrẽ beyegũ, diaye iribemi”, ¿ãrĩrãkuri? Irasũ ãrĩbirikõãrã! Marĩp̄ diayeta irigũ ããrĩmĩ. 15 Iripoegue Marĩp̄ Moisédere ãsũ ãrĩdi ããrĩmĩ: “Yũ bopoñarĩ merã ããrĩmarãrẽ bopoñarĩ merã ããrĩma. Yũ maĩrĩ merã

ĩaduarārē maĩgura”, ārĩdi āārĩmĩ. <sup>16</sup> Irasirirā ire masĩa. Marĩpu, ĩgũ bopoñaduarārē bopoñarĩ merā ĩāmi. Masaka ĩgūrē bopoñadoremakũ meta, ĩgũsā òārō irimakũ meta ĩgũsārē bopoñarĩ merā ĩāmi. <sup>17</sup> Marĩpu ĩgũya werenĩrĩ gojadea pũgue āsũ ārĩdi āārĩmĩ Egipto marā opure, faraðrē: “Yũ gāāmerōsũta mũrē Egipto marā opu āārĩbure pĩbu, mũ merā yũ turarire āārĩpererārē ĩmubu. Āārĩperero marārē, yũ turagu āārĩrĩrē masĩdoregu, irasiribu”, ārĩdi āārĩmĩ. <sup>18</sup> Irasirigu ĩgũ bopoñaduarārē bopoñarĩ merā ĩāmi. ĩgũ dorerire pėduamerārē nemorō pėduabirimakũ yāmi.

<sup>19</sup> Yũ irasũ ārĩrĩrē pérā, mũsā āsũ ārĩboko: “Marĩpu ĩgũ basita masakare ĩgũ dorerire pėduabirimakũ irikeregu, ¿nasirigu ĩgũsārē wajamoāgakuri? ¿Nasirisĩā, ĩgũ gāāmerō irasiririre kāmutasĩbokuri marĩ?” ārĩ pũrĩwisi sērēñaboko. <sup>20</sup> Irire irasũ ārĩbirikōāka! Marĩ masaka ubu āārĩrā, Marĩpu irinerā āārā. Irasirirā ĩgūrē: “¿Nasirigu yũre irasũ yāri mũ?” ārĩ pũrĩwisi sērēñamasĩbea. Diiarisoro irisoro weagore: “¿Nasirigo yũre irasũ yāri mũ?” ārĩberosũta marĩde Marĩpũre irasũ ārĩmasĩbea. <sup>21</sup> Sorori weago diiari merā igo iridũaro irikumũ. Irasirigo òārĩ soro iridũago, òārĩ soro irikumũ. Iri diiari merāta ubu āārĩrĩ sorodere iridũago, ubu āārĩrĩ soro irikumũ. Igo diiari merā irirosũta Marĩpũde masakare ĩgũ iridũarosũta yāmi.

<sup>22</sup> Marĩpu peamegue ĩgũ bėomurārē, ĩgũsārē ĩgũ turari merā bũro wajamoāburire masĩdoregu, ĩgũsā ñerō iririre gũñatura, mumurō marĩrō ĩgũsārē wajamoābemi. <sup>23</sup> Marĩ ĩgũ bopoñarĩ merā ĩārā

gapure ĩgũ õatarigũ ããrĩrĩrẽ masĩburo, ãrĩgũ, ĩgũsãrẽ irasirigũ yámi. Neõgoragueta marĩrẽ ãmũgasigue ĩgũ ããrĩrõsũta ĩgũ merã õãrõ ããrĩmurãrẽ beyedi ããrĩmĩ. <sup>24</sup> Marĩrẽ beyegũ, surãyeri judío masaka watopegue ããrĩrãrẽ, gajerã judío masaka ããrĩmerã watopegue ããrĩrãdere beyedi ããrĩmĩ, ĩgũyarã ããrĩburo, ãrĩgũ. <sup>25</sup> Marĩpũya werenĩrĩ gojadea pũgue ĩgũya kerere weredupuyudi Oseas, judío masaka ããrĩmerãyamarẽ ãsũ ãrĩ gojadi ããrĩmĩ:

Marĩpũ ãsũ ãrĩmĩ: “Yaarã ããrĩbirinerãrẽ: ‘Yaarã ããrĩma’, ãrĩgũkoa. Yũ maĩbirinerãrẽ: ‘Yũ maĩrã ããrĩma’, ãrĩgũkoa”, ãrĩmĩ.

<sup>26</sup> Marĩpũ: “Mũsã, yaarã meta ããrã”, ãrĩdea nĩkũ marãrẽ: “Yũ okanĩgũ pũrãta ããrã”, ãrĩsũrãkuma, ãrĩ gojadi ããrĩmĩ.✧

<sup>27-28</sup> Isaías, Israel bumarã gapure ãsũ ãrĩ gojadi ããrĩmĩ: “Marĩ Opũ ĩgũ ãrĩderosũta i ãmũ marãrẽ mumurõ merã diayeta wajamoãgũkumi. Irasirĩrã Israel bumarã wãdiyama ĩmipayeri irirosũ wãrã ããrĩkererã, mérãgã tausũrãkuma”, ãrĩ gojadi ããrĩmĩ.

<sup>29</sup> ĩgũta idere ãrĩ gojadi ããrĩmĩ doja:

Marĩ Opũ ããrĩpererã nemorõ turagũ, marĩ ñekũsãmarã ããrĩturiarãrẽ mérãgãrẽ taubirimakũ, marĩ judío masaka ããrĩpererã béosũbonerã ããrĩbũ. Sodoma marãrẽ, Gomorra marãrẽ béoderosũta marĩdere béobodi ããrĩmĩ, ãrĩ gojadi ããrĩmĩ.✧

*Judío masaka Jesucristoya kerere  
bũremubiridea*

<sup>30</sup> Irire pérã, ĩnaásũ ãrĩrãkuri? ãsũ ããrã.  
Judío masaka ããrĩmerã Marĩpũ merã ĩgũsã

õārõ ãārĩburire ãmabirikererã, ĩgũsã Jesucristore bũremurĩ merã irire bokama. Irasirigũ Marĩpũ ĩgũsãrẽ: “Õãrã ããrĩma”, ãrĩ ĩãmi. <sup>31</sup> Judío masaka gapũ: “Marĩpũ Moisére doreri pídeare marĩ irimakũ, marĩrẽ: ‘Õãrã, waja opamerã ããrĩma’, ãrĩ ĩãgũkumi”, ãrĩ gũñadima. Irasũ ãrĩ gũñakererã, iri dorerire iripeomasĩbirisĩã, Marĩpũ merã õārõ ããrĩbema. <sup>32</sup> ¿Nasirirã Marĩpũ merã õārõ ããrĩberi? Jesucristore bũremurõ marĩrõ ĩgũsã basi Marĩpũ Moisére doreri pídeare iridea merã gapũ, Marĩpũ merã õārõ ããrĩdũadima. Irasirirã Cristore Marĩpũ iriudire bũremumerã, Marĩpũ pũroque neõ waabirikuma. ĩgũsã ãtãye, maa deko píadeayegue gubu tũameémejãnerã irirosũ ããrĩrãkuma. <sup>33</sup> Marĩpũya werenĩrĩ gojãdea pũgue Marĩpũ ĩgũ magũrẽ iriburire ãsũ ãrĩ gojasũdero ããrĩbũ:

Sugũ yũ iriubure ãtãye irirosũ ããrĩgũrẽ Jerusalẽgue pígũra. ĩgũrẽ bũremumerã, iri yegue gubu tũameémejãrã irirosũ ããrĩrãkuma. Irasirirã yũ pũroque neõ ejabirikuma. ĩgũrẽ bũremurã gapũ: “Ĩgũrẽ ubugorata bũremukubũ”, ãrĩbirikuma. Yũ pũro ejarãkuma, ãrĩ gojasũdero ããrĩbũ.\*

## 10

<sup>1</sup> Yaarã, yũ Israel bumarãrẽ Marĩpũ ĩgũ tauburire bũro gããmea. Irasirigũ ĩgũrẽ ĩgũsãya ããrĩburire bũro sãrẽbosãa. <sup>2</sup> Diayeta ĩgũsã Marĩpũ gããmerĩrẽ bũro iridũakererã, ĩgũ gããmerĩrẽ õārõ pẽmasĩbema. <sup>3</sup> Marĩpũ marĩrẽ Jesucristore bũremurĩ merã:

\* 9:33 Is 28.16

“Ōārā āārīma”, ārī īārīrē masībema. Irasirirā īgūsā basi ōārīrē iridḡakererā, Marīpḡ Jesucristore bḡremudoregḡ iriudire bḡremubema. Irasirigḡ Marīpḡ īgūsārē: “Ōārā āārīma”, ārī īābemi. <sup>4</sup> Cristo āārīpereri Marīpḡ Moisére doreri pīdeare iripeodi āārīmí. Irasirigḡ Marīpḡ āārīpererā Cristore bḡremurānorē: “Ōārā, waja opamerā āārīma”, ārī īāmi.

<sup>5</sup> Moisés āsū ārī gojadi āārīmí: “Marī, Marīpḡ dorerire āārīpereri iripeomakū, Marīpḡ marīrē: ‘Ōārā, waja opamerā āārīma, yḡ merā ōārō āārīrākuma’, ārī īāgḡkumi”, ārī gojadi āārīmí. <sup>6</sup> Marīpḡ marīrē: “Ōārā, waja opamerā āārīma”, ārī īārī gapḡ āsū āārā. Marī Cristore bḡremumakū, Marīpḡ marīrē: “Ōārā āārīma”, ārī īāgḡkumi. Irasirirā āsū ārī gūñabirikōāka: “¿Noā Cristore ūmḡgasigue āārīgūrē āīdijugḡkuri marīrē taudoregḡ?” ārī gūñabirikōāka! Cristo í ūmḡguere marīrē taugḡ ejasiadi āārīmí. <sup>7</sup> Irasirirā doja: “¿Noā, boanerā āārīrōgue ūkūārī gobegue dijagḡkuri Cristore siiu marīribu?” ārī gūñabirikōāka! Marī basi irire irimasīña máa. Īgḡ boa, masā, marīasiadi āārīmí. <sup>8</sup> Marīpḡya werenírī gojadea pḡgue āsū ārī gojasūdero āārībú: “Marīpḡya kerere musā pésiáa. Irire musāya disi merā werenía. Musāya gūñarīgue: ‘Diayeta āārā iri’, ārī gūñáa”, ārī gojasūdero āārībú. Irire, marīrē Jesucristo tauri kerere diayeta bḡremua. Irasirirā masakare irireta werea. <sup>9</sup> Irasirirā marīya disi merā: “Jesús, yḡ Opḡ āārīmí”, ārī werenímakū, marīya gūñarīgue: “Īgḡ boadero pḡrḡ, Marīpḡ īgūrē masūdi āārīmí”, ārī bḡremumakū, Marīpḡ marīrē

perebiri peamegue waabonerārē taugukumi, ĩgũ merā ōārō āārĩnikõāburo, ārĩgũ. <sup>10</sup> Marĩpũ, marĩ Jesucristore buremumakũ, marĩrē: “Ōārā, waja opamerā āārĩma”, ārĩ ĩāmi. Marĩ gajerārē: “Jesucristo yũre taugũ āārĩmi, ĩgũrē buremua”, ārĩ weremakũ, marĩrē peamegue waabonerārē ĩgũ taumurā āārĩmakũ yāmi.

<sup>11</sup> Marĩpũya werenĩrĩ gojadea pũgue: “Neō sugũ ĩgũrē buremugũ: ‘Ĭgũrē ubugorata buremukubũ’, ārĩbirikumi”, ārĩ gojasũdero āārĩbũ. <sup>12</sup> Marĩpũ, āārĩpererā Opũ āārĩmi. Irasirigu judío masakare, judío masaka āārĩmerādere sũrosũta ĩāmi. Irasirigu āārĩpererārē ĩgũrē buremurĩ merā sērērārē ōārĩrē wārĩ sĩgukumi. <sup>13</sup> Marĩpũya werenĩrĩ gojadea pũgue āsũ ārĩ gojasũdero āārĩbũ: “ ‘Yũ Opũ, yũ ñerō irideare yũre kātika!’ ārĩ sērērāno tausũrākuma. Peamegue wajamoāsũbirikuma”, ārĩ gojasũdero āārĩbũ. <sup>14</sup> Irasũ āārĩkerepũũ, marĩ Opũre: “Diayeta marĩrē taugũ āārĩmi”, ārĩ buremumerā, ĩgũrē sērēmasĩbema. Ĭgũya tauri kerere pémerā, ĩgũrē buremumasĩbema. Ĭgũya kerere ĩgũsārē weregu marĩmakũ, irire masĩbirikuma. <sup>15</sup> Marĩpũ ĩgũya kerere weremurārē iriubirimakũ, irire wererā waabirikuma. Ĭgũya werenĩrĩ gojadea pũgue āsũ ārĩ gojasũdero āārĩbũ: “Marĩpũya ōārĩ kerere, ĩgũ merā ōārō siuñajārĩ opari kerere wererā ejamakũ ĩārā, marĩ bũro usuyāa”, ārĩ gojasũdero āārĩbũ.

<sup>16</sup> Iri Marĩpũ masakare tauri kere āārĩkerepũũ, wārā péduabema. Isaías āsũta ārĩ gojadi āārĩmĩ: “Gũũ Opũ, ĩgũsā gũũ wererire péduabema”, ārĩ gojadi āārĩmĩ. <sup>17</sup> Irasirirā Cristoya kerere weremakũ péduripírā, ĩgũrē buremurākuma.

18 Irasirigũ ire sērēñaduakoa musārē. ¿Israel bumarã iri kerere pébiryuri? Pénerã ããrĩmá. Marĩpũya werenĩrĩ gojadea pũguedere irasũta ãrĩ gojasũdero ããrĩbú:

Marĩpũyare wererimasã ããrĩpererogue marārē ãgũya kerere wererã waama. Irasiro ãgũsã wereni i ãmũ ããrĩpererogue seyakõaa, ãrĩ gojasũdero ããrĩbú.✧

19 Dupaturi musārē sērēñaduakoa doja. ¿Israel bumarã pékererã, õãrõ pémasĩbiryuri? Pémasĩnerã ããrãdima. Yũ irire werenemogũ, Moisés ãrĩdeare wererũrorigũra. Æsũ ãrĩ gojadi ããrĩmĩ:

Marĩpũ Israel bumarārē ãsũ ãrĩmi: “Ubu ããrĩrãrē, yaare pémasĩmerārē yaarã ããrĩmakũ irigũra. Yũ irasirimakũ ããrã, musã gapũ ãgũsãrē ãaturirãkoa. Irasirigũ musārē ãgũsã merã guamakũ irigũkoa”, ãrĩmi, ãrĩ gojadi ããrĩmĩ Moisés.✧

20 Pũrũ Isaiade: “Irasũ ãrĩbokoa”, ãrĩ, gũiri marĩrõ ãsũ ããrĩnemopeodi ããrĩmĩ:

Æsũ ãrĩmi Marĩpũ: “Yũre ãmamerã gapũ yũre bokama. Irasirigũ yũre masĩmerārē yũre masĩmakũ iribũ”, ãrĩmi, ãrĩ gojadi ããrĩmĩ Isaiás.✧

Judío masaka ããrĩmerã Marĩpũyarã ããrĩburire wererũ irasũ ãrĩ gojadi ããrĩmĩ. <sup>21</sup> Israel bumarã gapũre ãsũ ãrĩ gojadi ããrĩmĩ: “Æsũ ãrĩmi Marĩpũ: ‘Ëmũrikũ yũ merã õãrõ ããrĩdũarã aarika!’ ããrĩdĩbũ ãgũsãrē. ‘Ëgũsã gapũ yũ dorerire tarinũgãrã, yũre péduabirima’, ãrĩmi”, ãrĩ gojadi ããrĩmĩ Isaiás.

✧ 10:18 Sal 19.4 ✧ 10:19 Dt 32.21 ✧ 10:20 Is 65.1

# 11

## *Marĩpu Israel bumarãrẽ beyedeamarẽ gojadea*

<sup>1</sup> Irasirigu musãrẽ ire sêrẽñagura. ¿Marĩpu Israel bumarãrẽ: “Yaarã ããrĩma”, ãrĩdero puru, ãgũsãrẽ béokõãyuri? Béobiridi ããrĩmí. Yude Israel buma, Abraham parãmi ããrĩturiaguta Benjamĩya buma ããrã. <sup>2</sup> Iripoegue Marĩpu Israel bumarãrẽ ãgũyarã ããrĩburo, ãrĩgũ, beyedi ããrĩmí. ãgũ irasũ beyenerãrẽ béobemi. Musã Marĩpuya kerere weredupuyudi Elías ãgũrẽ: “Israel bumarã waja opama”, ãrĩdeare masĩkoa. Irire Marĩpuya werenĩrĩ gojadea pũgue ãsũ ãrĩ gojadi ããrĩmí: <sup>3</sup> “Yu Opu, Israel bumarã muya kerere weredupuyurimasãrẽ wẽjẽkõãma. Murẽ sĩdea soepeorore tuúmeédijukõãma. Irasirigu ãgũsã watope yu suguta murẽ buremua. Yu irasũ ããrĩmakũ ããrã, yudere wẽjẽduama”, ãrĩ gojadi ããrĩmí. <sup>4</sup> ãgũ irasũ ããrĩmakũ pẽgu, Marĩpu ãsũ ãrĩ yujũdi ããrĩmí: “Mu, suguta ããrĩbea. Yaarã siete mil ããrĩma. ãgũsãrẽ iritamuba. Irasirirã yure õãrõ buremuma. Baal wãikugu keori weadeare neõ buremubema. Irasirigu murẽ wẽjẽduarãrẽ gũibirikõãka!” ãrĩdi ããrĩmí. <sup>5</sup> Elías ããrĩripoe Marĩpu ãgũ beyenerãrẽ iritamuderosũta daporadere Israel bumarã watopere surãyeri ãgũ beyenerãrẽ iritamumi. Irasirirã ãgũrẽ buremuma. ãgũsãrẽ bopoñarĩ merã ããsĩã, beyedi ããrĩmí. <sup>6</sup> ãgũsã iririkurire ããgũ meta beyedi ããrĩmí. ãgũsãrẽ bopoñagũ beyedi ããrĩmí. ãgũsã õãrõ iriadero puru ãgũsãrẽ beyegu, bopoñagũ meta iribokumi. ãgũsã õãrĩrẽ iridea waja ããrĩbokuyo.

7 Āsū āārā. Israel bumarā īgūsā iriri merā, Marīp̄ ĩgūsārē: “Ōārā āārīma”, ārī īāmakū gāāmekererā, īgūsā Marīp̄ merā ōārō āārīburire neō bokabema. Irasirirā Marīp̄yare neō pémasīmerā dujama. Marīp̄ beyenerā gap̄ īgū merā ōārō āārīma. 8 Marīp̄ya werenīrī gojadea pūgue āsū ārī gojasūdero āārībú: “Marīp̄ īgūrē gāāmemerārē īgūyare pémasībirimakū yāmi. Irasirirā diayemarē pékererā, pémasībema. Īgū iririre īākererā, īāmasībema. Daporaguedere irasūta āārīnīkōāma”, ārī gojasūdero āārībú.

9 Davide āsū ārīdi āārīmī Marīp̄re:

Israel bumarā bosenurī irirā ñerō yāma. Irasiriḡ, īgūsā ñerīrē iriri merā īgūsārē wajamoāsūmurā āārīmakū irika!

10 Īgūsārē pémasīmerā, koye īāmerā irirosū waamakū irika! Īmurik̄ nukārī ūūmarā sūgū pūrīsūrā irirosū ñerō tarimakū irika! ārīdi āārīmī David Marīp̄re.✧

*Marīp̄ judío masaka āārīmerārē tauḡkumi, ārī gojadea*

11 Gaji m̄sārē sērēñanemogura. ¿Judío masaka Jesucristore b̄remubirimakū, Marīp̄ īgūsārē béopeokōāyuri? Béopeobiridi āārīmī. Īgūsā Cristore irasū b̄remubirimakū, daporare judío masaka āārīmerā gap̄ Marīp̄ taumurā āārīma. Īgūsārē īgūyarā waamakū yāmi, judío masakade īgūsārē īākūī, īgūsāde Cristore b̄remuburo, ārīgū. 12 Judío masaka Cristore b̄remubirisīā, Marīp̄ īgūsārē: “Ȳ pūrārē ōārī sīgura”, ārīdeare opabema.

✧ 11:10 Sal 69.22-23

Irasirirã judío masaka ããrĩmerã gapu Cristore b̄remurã, irire oparãkuma. Puru judío masaka Cristore b̄remumakũ, ããrĩpererãrẽ i umu marãrẽ nemorõ õãrõ waarokoa.

13 Daporare musãrẽ judío masaka ããrĩmerãrẽ weregura. Jesucristo yure musãrẽ judío masaka ããrĩmerãrẽ ãgũya kerere weredoregu pími. Ire weregu, ubugora irigu meta yáa. 14 ãgũyare weregu, gajipoe irigu surãyeri yaarãrẽ judío masakare musãrẽ ããkũĩmakũ iribokoa, ãgũsãde Jesucristore b̄remuburo, ãrĩgũ. ãgũrẽ b̄remurã, tausũrãkuma ãgũ merã õãrõ ããrĩmurã. 15 Marĩpu judío masakare Cristore b̄remumerãrẽ béomakũ, gajerã gapu ãgũ merã siuñajãrĩ opama. Judío masakade ãgũrẽ b̄remumakũ, õãtarirokoa. ãgũsã boanerãgue masãnerã irirosũ Marĩpu merã perebiri okarire oparãkuma. 16 ãsũ ããrã. Pã iriri merã suru iripuroriduru Marĩpore sĩmakũ, ããrĩpereri iri pã iriri Marĩpuya ããrã. Yuku nũgũrĩ Marĩpuya ããrĩmakũ, irigu dũpũride ãgũya ããrã. Gũ ãnekũ Abraham, irigu nũgũrĩ irirosũ ããrĩdi ããrĩmĩ. Marĩ Jesucristore b̄remurã Abraham parãmerã ããrĩturiarã ããrã. Irasirigu Marĩpu ãgũrẽ: “Yaagu ããrĩmĩ”, ãrĩ ããderosũta marĩdere: “Yaarã ããrĩma”, ãrĩ ããmĩ.

17 Judío masaka olivogu dũpũri irirosũ ããrĩma. ãgũsã irasũ ããrĩkerepũ, su dũpũrire ditibéoderosũ Marĩpu surãyeri ãgũsãrẽ béodi ããrĩmĩ. Puru iri dũpũri ããrĩderore gajigu olivo makãnũmũma dũpũrire puriñeãtuadoregu, wiiri, puũñeãtuorosũ iridi ããrĩmĩ. Irasiriderosũ musãrẽ judío masaka ããrĩmerãrẽ ãgũyarã ããjãmakũ iridi ããrĩmĩ. Irasirirã

musã judío masaka ããrĩbirikererã, ããrĩpereri Marĩpũ Abraham parãmerã ããrĩturiarãrẽ õãrĩrẽ sĩgũra, ãrĩdeare musãde ñeãnerã ããrĩbũ. <sup>18</sup> Musãrẽ ĩgũ irasirimakũ: “Gũa judío masaka nemorõ õãrã ããrã”, ãrĩ gũñabirikõãka! Ire gũñaka! Judío masaka olivogu Marĩpũ otedi irirosũ ããrĩma. Musã gapũ irigũgue ĩgũ ãĩtũdea dũpũri irirosũ ããrã. Irasirigu judío masaka merã musãrẽ iritamumi. Musã merã meta ĩgũsãrẽ iritamumi.

<sup>19</sup> Musã judío masaka ããrĩmerã gapũ ãsũ ãrĩboko: “Surãyeri judío masakare, olivogu dũpũrire ditibéoderosũ Marĩpũ ĩgũsãrẽ béodi ããrĩmĩ. Irasũ béogu, gaji dũpũrire irigũgue ĩgũ ãĩtũderosũ marĩrẽ pídi ããrĩmĩ, ĩgũyarã ããrĩmurãrẽ”, ãrĩboko musã. <sup>20</sup> Irasũta ããrã. ĩgũsã Jesucristore bũremubiridea waja Marĩpũ ĩgũsãrẽ béodi ããrĩmĩ. Irasirigu musãdere Cristore bũremubirimakũ, ĩgũyarã ããrĩmakũ iribiribodi ããrĩmĩ. Irasirirã: “Gũa judío masaka nemorõ õãrã ããrã”, ãrĩ gũñabirikõãka musã! Irasũ ãrĩmerãta Marĩpũre õãrõ gopeyari merã bũremuka! <sup>21</sup> Pũrorima dũpũri irirosũ judío masaka Marĩpũyarã ããrĩpũrorinerã ããrĩmã. Musã gapũ ĩgũsã pũrũ ĩgũyarã waanerã ããrĩbũ. Irasirigu Marĩpũ ĩgũyarã ããrĩpũrorinerã ĩgũrẽ bũremubirimakũ, ĩgũsãrẽ béodi ããrĩmĩ. Musã ĩgũrẽ bũremubirimakũ, ĩgũsãrẽ béoderosũta musãdere béogũkumi. <sup>22</sup> Marĩpũ õãrõ irigu bopoñarĩrẽ, ĩgũ turari merã wajamoãrĩrẽ pémasĩka! ĩgũrẽ bũremumerãrẽ wajamoãgũkumi. Irasirikeregũ, musã piriro marĩrõ ĩgũrẽ bũremunĩmakũ, musãrẽ õãrõ irigũkumi. ĩgũrẽ bũremubirimakũ, ñerĩ dũpũrire ĩgũ ditibéoderosũta musãdere béogũkumi.

23 Judío masaka ìgũ béosũnerã Jesucristore b̄remumakũ, ìgũsãrẽ yukũ d̄p̄urire ditibéodeare dupaturi irigũgueta ãítúro irirosũ irigũkumi, ìgũyarã ñajãmakũ irigũ. Ìgũ sugũta ìgũ turari merã irire irimasĩmi. 24 Mũsã judío masaka ããrĩmerã olivo makãñũmũma d̄p̄uri irirosũ ããrã. Judío masaka gapũ ìgũ beyep̄urorinerã ããrĩmã. Olivogũ Marĩp̄ũ otedi irirosũ ããrĩma. Mũsã irigũgue ìgũ ãítúdea d̄p̄uri irirosũ ããrã. Irasirigũ Marĩp̄ũ mũsãrẽ ìgũyarã ñajãmakũ iridi ããrĩmĩ. Mũsãrẽ irasirikeregũ, judío masakare ìgũ beyep̄urorinerã gapũre mũsã nemorõ ìgũyarã dupaturi ñajãmakũ irimasĩmi.

*Pũrgue Israel bumarãrẽ Marĩp̄ũ taugũkumi, ãrĩ gojadea*

25 Yaarã, masaka iripoegue masĩbirideare, Marĩp̄ũ ìgũ gũñaderosũta iriburire weregũra mũsãrẽ: “Gũa judío masaka nemorõ masĩpeokõã”, ãrĩ gũñabirikõãburo, ãrĩgũ. Wãrã judío masaka Marĩp̄ũyare p̄emasĩturabema dapa. Marĩp̄ũ judío masaka ããrĩmerãrẽ: “B̄remurãkuma”, ãrĩnerãkũta Cristore b̄remudero p̄urũ, judío masakade b̄remurãkuma. 26 Ìgũsã irasũ b̄remumakũ, ããrĩpererã Israel bumarãrẽ Marĩp̄ũ ìgũsã peamegue waabonerãrẽ taugũkumi. Ìgũya werenĩrĩ gojadea pũgue ãsũ ãrĩ gojasũdero ããrĩbũ: Jerusalẽgue, Siõn wãĩkũri makãgue, judío masakaya makãgue ìgũsãrẽ taubu aarigũkumi. Ìgũsãrẽ Jacob parãmerã ããrĩturiarãrẽ ìgũsã ñerĩrẽ béogũkumi.✧

✧ 11:26 Is 59:20

27 Marĩpu ãsũ ãrĩmi: “Ígũsãrẽ ñerĩrẽ béogu, yu ígũsãrẽ ãrĩdeare irigũkoa”, ãrĩ gojasũdero ããrĩbú.\*

28 Inũguere wárã judío masaka Jesucristoya kerere péduamerã, Marĩpure iaturirã ããrĩma. Ígũsã irasũ ããrĩmakũ, musã judío masaka ããrĩmerã gapu Cristore buremunugãbu. Irasirigu Marĩpu judío masaka ñekũsãmarã ígũ beyenerã ígũsã ããrĩmakũ, ígũsãrẽ ããrĩturiarãdere maĩmi. 29 “Ígũsãrẽ õãrĩrẽ sígura”, ãrĩ gũñadeare gorawayubemi. Ígũ ãrĩderosũta ígũ beyenerãrẽ õãrĩrẽ diayeta sígũkumi. 30 Iripoeguere musãde Marĩpu dorerire tarinugãnerã ããrĩbú. Inũguere judío masaka Marĩpu dorerire ígũsã tarinugãmakũ iãgũ, musã gapure bopoñarĩ merã iãmi. 31 Daporare judío masaka ígũ dorerire tarinugãrã ããrĩma. Ígũsã irasũ ããrĩkerepuru, Marĩpu musãrẽ bopoñarĩ merã iãrõsũta, ígũsãdere bopoñarĩ merã iãmi. 32 ãsũ ããrã. Marĩpu ããrĩpererã masakare ígũ dorerire ígũsã tarinugãmakũ, ígũsãrẽ peresu irigu irirosũ iridi ããrĩmĩ, purugue ígũ ããrĩpererãrẽ bopoñarĩ merã iãrĩrẽ masĩburo, ãrĩgũ.

33 Marĩpu marĩrẽ bopoñatarigu, turatarigu, ããrĩpererire masĩpeogu ããrĩmi. Irasirirã marĩ ígũ gũñarĩrẽ, ígũ iriburire õãrõ pémasĩbea.

34 ãsũ ãrĩ gojasũdero ããrĩbú Marĩpuya werenĩrĩ gojadea pũgue: “Masaka marĩ Opu gũñarĩrẽ õãrõ pémasĩbema. Irasirirã ígũrẽ: ‘ãsũ irika!’ ãrĩ weremasĩbema. 35 Marĩpure gajino sĩ, puru: ‘Marĩrẽ wajamomi’, neõ ãrĩmasĩbema”, ãrĩ gojasũdero ããrĩbú. 36 Marĩpu ããrĩpererire iridi

\* 11:27 Jer 31.33-34

ããrĩmĩ. Īgũ turari merã ããrĩpererire ããrĩmakũ iridi ããrĩmĩ. Irasiriro ããrĩpereri Īgũya dita ããrã. Irasirirã ããrĩpererã Īgũrẽ: “Ōãtaria mɯ”, ãrĩ, usuyari sĩnĩkõãrã! Irasũta irirã!

## 12

### *Marĩɯ dorerire irinĩkõãka! ãrĩ gojadea*

<sup>1</sup> Yaarã, Marĩɯ marĩrẽ bũro bopoñarĩ merã ããmi. Irasirirã marĩrẽ Īgũrẽ bũremurã waibũ sũnaderosũta daporare marĩ basita sĩrõ gããmea. Irasirirã marĩ okaro bokatĩũrõpã Īgũyarã ããrĩrã Īgũ dorerire õãrõ irinĩkõãrã! Īgũrẽ marĩ merã usuyamakũ gããmerã, irasirirãkoa. Āsũ iriro gããmea marĩrẽ Īgũrẽ bũremurãrẽ. <sup>2</sup> I ɯmɯ marã Īgũsã ñerĩ iririkũrere neõ irinemobirikõãrã! Āsũpero gapɯ ãrĩrã! Marĩɯre: “Gua gũñarĩrẽ õãrĩ gapure gorawayuwãgãnĩkõãka!” ãrĩrã! Īgũ marĩrẽ gorawayumakũ, marĩ Īgũ gããmerĩrẽ: “Āsũ ããrã”, ãrĩ masĩrãkoa. Īgũ gããmerĩ, õãrĩ dita ããrã. Iri, ñerĩ marĩrĩ ããrã. Marĩ Īgũ gããmerĩrẽ irirã, Īgũrẽ usuyamakũ irirãkoa.

<sup>3</sup> Marĩɯ yure õãrõ irigũ, mũsãrẽ Īgũya kerere weredoregũ beyedi ããrĩmĩ. Irasirigũ mũsãrẽ ããrĩpererãrẽ ãsũ ãrĩ weregũra. Neõ sugũ irimasĩbirikeregũ: “Yɯ irikõãmasĩã”, ãrĩ gũñabirikõãrõ gããmea. Marĩ irimasĩrĩ direta: “Diaye irimasĩã”, ãrĩ gũñarõ gããmea. Irasirirã marĩ masakakũ ãsũ ãrĩ gũñarã: “Marĩɯ yure irimasĩrĩ pídeare Īgũrẽ yɯ bũremurõ oparosũta yɯ bokatĩũrõ irimasĩã”, ãrĩ gũñarã! <sup>4</sup> Sugũ masakũya dupɯ ãsũ ããrã. Su dupɯ ããrĩkerero, wãri opãa. Wãri ããrĩkerero, sũrosũ moãbea. <sup>5</sup> I irirosũta marĩ Jesucristore

buremurã wárã ããrĩkererã, ïgũ merã ããrĩrã suguya dupu irirosũ ããrã. Irasirirã marĩ ããrĩpererã su dupuma moãrõ irirosũ yáa.

<sup>6</sup> Irasirigũ Marĩpu marĩrẽ maĩgũ, marĩ masakakũre gajerosũperi dita marĩ irimasĩburire pídi ããrĩmĩ. Irasirirã irire õãrõ iriro gããmea. Marĩrẽ ïgũya kerere weretaudoregũ pímakũ, marĩ ïgũrẽ buremurõ oparosũta ïgũyare gajerãrẽ õãrõ weretauro gããmea. <sup>7</sup> Marĩrẽ gajerãrẽ iritamudoregũ pímakũ, ïgũsãrẽ õãrõ iritamurõ gããmea. Gajerãrẽ ïgũyare buedoregũ pímakũ, ïgũsãrẽ õãrõ buero gããmea. <sup>8</sup> Marĩrẽ gajerãrẽ gũñaturamakũ irimurãrẽ pímakũ, irire õãrõ iriro gããmea. Marĩrẽ gajerãrẽ ïgũsã gããmerĩrẽ sĩmurãrẽ pímakũ, gajinorẽ sĩrã õãrõ usuyari merã sĩrõ gããmea. Marĩrẽ gajerãrẽ doremurãrẽ pímakũ, õãrõ merã dorero gããmea. Marĩrẽ gajerãrẽ bopoñarĩ merã iritamumurãrẽ pímakũ, ïgũsãrẽ iritamurã usuyari merã iritamurõ gããmea.

*Jesucristore buremurã ãsũpero ããrĩdorea, ãrĩ gojadea*

<sup>9</sup> Gajerãrẽ maĩrã, diayeta maĩka! Ñerĩrẽ dooka! Õãrĩ gapu direta iriwãgãníka! <sup>10</sup> Mũsã Jesucristore buremurã, sugu pũrã gãme maĩrõsũta mũsã merãmarã merã gãme maĩka! ïgũsãya ããrĩburire mũsãya nemorõ gũñaka! Buremurĩ merã õãrõ gãme iritamuka!

<sup>11</sup> Marĩ Opũ dorerire irirã, neõ tébori marĩrõ õãrõ usuyari merã irika!

<sup>12</sup> “Marĩpu õãrõ iritamugukumi yare”, ãrĩ, usuyari merã ïgũ iritamuburire yúka! Irasirirã ñerõ tarirã, Marĩpũre piriro marĩrõ sũrosũ

gũñaturari merã buremuníkõãka! Ìgũrẽ irasũ sërënikõãka!

<sup>13</sup> Jesucristore buremurã gajino gããmemakũ ìãrã, mũsã opari merã ìgũsãrẽ iritamuka! Mũsãya wi-irigue ejarãrẽ õãrõ bokatĩrĩñeãka!

<sup>14</sup> Mũsãrẽ ñerõ irirãrẽ ìgũsãya ããrĩburire Marĩpũre sërëbosaka! “Ìgũsã yũre ñerõ iriri waja ìgũsãrẽ wajamoãka!” ãrĩ sërëbirikõãka!

<sup>15</sup> Gajerã mũsuyamakũ ìãrã, ìgũsã merã mũsãde mũsuyaka! Gajerã oremakũ ìãrã, mũsãde ìgũsã merã oreka!

<sup>16</sup> Gajerã merã sũrosũ mũsuyari merã ããrĩrikuka! “Yũ gajerã nemorõ õãgũ ããrã”, ãrĩ gũñabirikõãka! Ubu ããrĩrã merãdere õãrõ ããrĩrikuka! “Masĩtarinũgãgũ ããrã yũ”, ãrĩ gũñabirikõãka!

<sup>17</sup> Gajerã mũsãrẽ ñerõ irikerepũrũ, ìgũsãrẽ ñerõ iri gãmbirikõãka! Ñerĩ gapũre irirõno irirã, ããrĩpererã masaka ìũrõrẽ õãrĩ gapũre irika!

<sup>18</sup> ããrĩpererã merã mũsã õãrõ ããrĩrikũbuosũta mũsã bokatĩũrõ õãrĩrẽ irika!

<sup>19</sup> Yaarã yũ maĩrã, gajerã mũsãrẽ ñerõ irikerepũrũ, ñerõ iri gãmbirikõãka! Mũsã basi ìgũsãrẽ wajarãkũbirikõãka! Marĩpũ gapũ mũsãrẽ ñerõ irinerãrẽ wajamoãgũkumi. Ìgũya werenĩrĩ gojadea pũgue ãsũ ãrĩ gojasũdero ããrĩbũ: “Marĩ Opũ ãsũ ãrĩmi: ‘Yũ gapũ, masaka ñerõ iridea waja ìgũsãrẽ wajamoãgũ ããrã. Ìgũsãrẽ diayeta wajamoãgũra’, ãrĩmi”, ãrĩ gojasũdero ããrĩbũ.

<sup>20</sup> Gaji ãsũ ãrĩ gojasũdero ããrĩbũ: “Mũrẽ ìãturigu mũboamakũ ìãgũ, baari ejoka! Ìgũ ñemesibusũmakũ ìãgũ, iirĩri tĩãka! Mũ irasirimakũ, ìgũ mũrẽ ñerõ

irideare gʷayasĩrĩgʷukumi”. 21 Irasirirã mʷsãrẽ ñerõ irinerãrẽ ñerõ iri gãmibirikõãka! Ñerĩ gapure irirono irirã, ĩgʷsãrẽ õãrõ irika! Irasiriri merã ñerĩ iririre tarinʷgãrãkoa.

## 13

1 Marĩpʷ dita i ʷmʷ marã oparãrẽ sóomi. ĩgʷ pĩnerã ããrĩma. Irasirirã ããrĩpererã ĩgʷsãrẽ õãrõ yʷjʷka! 2 Sugʷ oparãrẽ tarinʷgãgʷno, Marĩpʷ pĩnerãrẽ tarinʷgãgʷ yámi. Marĩpʷ ĩgʷsãrẽ tarinʷgãrãrẽ wajamoãgʷkumi. 3 Oparã, õãrõ irirãrẽ gʷimakʷ iribema. Ñerõ irirã gapure gʷimakʷ yáma. Gʷimerãta ããrĩrikʷduarã, õãrõ irika! Irasirimakʷ, oparã mʷsãrẽ: “Õãrõ yáa”, ãrĩrãkuma. 4 Marĩpʷ ĩgʷsãrẽ mʷsãya ããrĩburire iritamudoregʷ pĩdi ããrĩmĩ. Irasirirã ñerõ irirã gʷika! Oparã, ñerĩ irirãrẽ wajamoãrã, Marĩpʷ dorero irirãta yáma. Marĩpʷ ñerõ irirãrẽ wajamoãdoregʷ oparãrẽ pĩdi ããrĩmĩ. 5 Irasirirã oparã marĩrẽ doremakʷ, bʷremurĩ merã ĩgʷsã dorerire õãrõ yʷjʷro gããmea. Wajamoãrĩ, ãrĩrã dita yʷjʷbirikõãrõ gããmea. “Marĩpʷ iũrõ ĩgʷ gããmerĩrẽ iridʷakoa”, ãrĩ gʷñarĩ merã ĩgʷsã dorerire õãrõ yʷjʷro gããmea. 6 Oparã ĩgʷsã moãrĩrẽ õãrõ irirã, Marĩpʷure moãboerã irirosũ ããrĩma. Irasirirã ĩgʷsã wajasearopã keoro wajarika!

7 ããrĩpererã oparã dorerosũta keoro irika! ĩgʷsã wajaseamakʷ wajarika! ĩgʷsã gajinorẽ irimurã wajaseamakʷde wajarika! Irasirirã mʷsã oparãrẽ bʷremuka! ĩgʷsãrẽ goepeyari merã iãka!

8 Neõ gajerãrẽ wajamorĩrẽ opabirikõãka! ĩgʷsãrẽ wajamorĩrẽ oparono irirã, maĩrĩ gapure

opaka! Sugũ ĩgũ bokajagũnorẽ maĩrĩ merã iritamugũno, Marĩpũ doreri pídeare keoro irigũ yámi. <sup>9</sup> Āsũ ārã Marĩpũ doreri pídea: “Gajigũ marãpo merã, nomede gajego marãpũ merã ñerõ iribirikõãka! Masakare wějěbéobirikõãka! Yajabirikõãka! Gajerãyamarẽ ārĩgatori merã werebirikõãka! Gajerãyare ɯaribejabirikõãka!” ārĩ werea. Gaji ĩgũ doreri pídea āsũ ārã: “Mũ basi maĩrõsũta mũ pũro āārĩrãdere maĩka!” ārĩ werea. Mũsã gajerãrẽ maĩrã, Marĩpũ doreri pídea āārĩpererire irirã yáa. <sup>10</sup> Gajerãrẽ maĩgũno, ĩgũsãrẽ neõ ñerõ iribemi. Irasirigũ ĩgũsãrẽ maĩgũno, Marĩpũ doreri pídeare iripeogu yámi.

<sup>11</sup> I āārĩpererire gũñaka! Irasirirã pémasĩka! Kãrĩrã irirosũ āārĩbirikõãka! Marĩ iripoegue Jesucristoya kerere b̄aremupũrorirã, ɯmũgasigue marĩ waaburi d̄ɯyataria, ārãdibũ. Daporare marĩ masĩa. Jesucristo dupaturi aariburo mérõ d̄ɯyáa. <sup>12</sup> Irasiriro boyomũrĩro irirosũ āārã. Irire masĩrã, ñerĩrẽ masaka naĩtĩārõgue iririre pirirã! Ōārĩrẽ boyorogue masaka ĩũrõ iriri gapũre irirã! Marĩ irasirirã, Marĩpũ turari merã ñerĩ iririre pirikõārãkoa. <sup>13</sup> Irasirirã masaka ɯmũ merã deyorogue ōārĩrẽ irirã irirosũ irirã! Bosenũrĩ āārĩmakũ, mejã, gainĩbirikõārã! Nome merã ñerõ iribirikõārã! Nomede ɯma merã ñerõ iribirikõãburo. Gajerã merã gãme guaseobirikõārã! Gajerãyare ububirikõārã! <sup>14</sup> Āsũ gapũ āārĩrikũrã! Marĩ Opũ Jesucristo iritamurĩ merã ĩgũ irirosũ ōārõ āārĩrikũrã! Marĩ ñerĩ ɯaribejarire iridũarire pirikõārã!

## 14

*Marĩ Jesucristore b̄remurā gāme  
werew̄abirikōārō gāāmea*

<sup>1</sup> Suḡu Jesucristore b̄remuturabi āārīkereḡu, ĩḡū m̄sā merā āārīd̄uamakū, ĩḡūrē werew̄aro marīrō ñeāka! ĩḡūrē ñeārā, Marīp̄uyare masībirimakū ĩārā, ĩḡū merā guaseobirikōāka! <sup>2</sup> Gajerā surāyeri Jesucristore b̄remurā: “Marĩ āārīpereri baamakū ōāgorāa”, ārīma. Gajerā gap̄u Jesucristore b̄remuturamerā: “Marĩ waib̄u dīi baarā, Marīp̄u dorerire tarin̄gābokoa”, ārī gūñama. Irasirirā oteri direta baarik̄uma. <sup>3</sup> Āārīpererire baaḡu, oteri direta baaḡure irasū ĩābéobirikōāburo. Oteri direta baaḡude āārīpererire baaḡure: “Irasū baamakū ñegorāa”, ārībirikōāburo. Marīp̄u āārīpereri baaḡudere: “Yaaḡu āārīmi”, ārī ĩāsiadi āārīmī. <sup>4</sup> Marĩ gajiḡure moāboeḡure: “Ñerō yāa”, ārīmasībirikoa. ĩḡū op̄u dita irasū ārīmasīmi. Marĩ Jesucristore b̄remurāde irasūta āārā. Irasirirā marĩ gajerā Jesucristore b̄remurārē: “Ñerō yāa”, ārīmasībirikoa. Marīp̄u ĩḡūsā Op̄u āārīmi. ĩḡū suḡuta ĩḡūsārē: “Ōārō yāa, o ñerō yāa”, ārīmasīmi. ĩḡū turaḡu āārīsīā, ĩḡūyarārē ĩḡūrē ōārō b̄remuturamakū iriḡukumi.

<sup>5</sup> Gaji werenemoḡura m̄sārē. Surāyeri: “Sun̄ta gajin̄rī nemorō Marīp̄ure b̄remurō gāāmea”, ārī gūñama. Gajerā gap̄u: “Āārīpererin̄rī s̄rosū, Marīp̄uya āārā”, ārī gūñama. Irasirirā masakak̄u: “Marīp̄u ȳare āsū irimakū gāāmemei”, ārī gūñarō gāāmea. <sup>6</sup> Suḡu: “Irin̄no direta nerē, Marīp̄ure b̄remudorea”, ārī gūñaḡū, Marīp̄ure b̄remubu

irasũ ãrĩ gũñami. Gajigũ ããrĩpererire baagũde Marĩpũre: “Yũ baari, mũ sĩdea ããrã”, ãrĩ, ɯɯyari sĩmi. Irasirigũ ĩgũde Marĩpũre bũremugũta ããrĩmi. Gajigũ gajinorẽ baabide Marĩpũre bũremumi. ĩgũde Marĩpũre: “Yũ baari, mũ sĩdea ããrã”, ãrĩ, ɯɯyari sĩmi.

<sup>7</sup> Marĩ okarã, boarãde marĩ basi: “Ãsũ irigũra”, ãrĩmasĩña máa. <sup>8</sup> Marĩ, Jesucristoyarã marĩ okarinũrĩrẽ ĩgũyare irimurã ããrã. Marĩ boadero pũruguedere ĩgũyarã ããrĩnĩkõãrãkoa. Irasirigũ marĩ okamakũ, marĩ boamakũdere Cristo marĩ Opũta ããrĩnĩkõãgukumi. <sup>9</sup> Irasũta ããrã. Cristo boa, pũrũ masãdi ããrĩmĩ ããrĩpererã okarã, boanerã Opũ ããrĩbu.

<sup>10</sup> Iro merẽ, ɔnasirirã mũsã gajerã Jesucristore bũremurãrẽ: “Ñerõ yáma”, ãrĩ werewũari? ɔNasirirã ĩgũsãrẽ irasũ ĩãbéokõãrĩ? Cristo marĩ ããrĩpererãrẽ ĩgũ diaye nĩdoregukumi marĩ irideare werebu. Irasirirã gajerã Jesucristore bũremurãrẽ: “Ñerõ yáma”, ãrĩ werewũabirikõãrõ gããmea.

<sup>11</sup> Marĩpũya werenĩrĩ gojadea pũgue ãsũ ãrĩ gojasũdero ããrĩbũ:

Ãsũ ãrĩmi marĩ Opũ: “Yũ okagu ããrã. Yũ werenĩrĩ diayeta ããrã. ããrĩpererã yũ ĩũrõ ñadukũpuri merã ejamejãrãkuma. ããrĩpererã yure: ‘Mũ, gũa Opũ õãgũ, turagũ ããrã’, ãrĩrãkuma”, ãrĩ gojasũdero ããrĩbũ.\*

<sup>12</sup> Irasirirã, Marĩpũ marĩ irideare sêrẽñamakũ, marĩ masakakũ ããrĩpereri marĩ irideare wererãkoa.

*Neõ mũsã iriri merã gajerã Jesucristore bũremurãrẽ ñerĩ irimakũ iribirikõãka!*

\* 14:11 Is 45.23

13 Irasirirã gãme werewuamemobirikõãrã! Æsũ gapu ãrĩ gũñarã! “Gua iriri merã gajerã Jesucristore buremurãrẽ ñerĩ irimakũ iridubirikoa”, ãrĩ gũñarã! 14 Yu, marĩ Opu Jesucristore buremugũ, ãsũ õãrõ masĩa. Æãrĩpereri Marĩpu baari pídea õãgoráa yure. Gajigu gapu: “Yu irire baamakũ, ñegoráa”, ãrĩ gũnamakũ, ãgũrẽ diayeta ñegoráa. 15 I diayeta ããrã. Gajigu Jesucristore buremugũ, ãgũ baabirire musã baamakũ ããgũ: “Iri Marĩpu baadorebiridea ããrã”, ãrĩ gũñakeregu, musãrẽ ããkũĩ, baabokumi. Irasũ baagu: “Ñerõ iriabu”, ãrĩ gũñarĩkubokumi. Irasirirã, ãgũ baabirire dupaturi baarã, ãgũrẽ maĩrã meta yáa. Cristo ãgũdere boabosadi ããrĩmĩ. Irasirirã musã baari merã gajigu Cristore buremugũrẽ poyanorẽbirikõãka! 16 Irasirirã: “Gua ãsũ iriri õãgoráa”, ãrĩ gũñakerepu, gajerã gapu musãrẽ: “Ñerõ yáma”, ãrĩ werewuamakũ pérã, dupaturi irire irinemobirikõãka! 17 Marĩpu ãgũyarãrẽ doreri: baa, iirĩri meta ããrã. I gapu ããrã. Diayemarẽ irinĩrĩ, ãgũ merã siuñajãrĩ opari, usuyari merã ããrĩrĩ ããrã. Irire Õãgũ deyomarĩgũ iritamurĩ merã irisũa. 18 Sugũ irasũta Cristoyare õãrõ irigu Marĩpũre usuyamakũ yámi. Masakade ãgũ õãrõ irimakũ ããrã, ãgũrẽ: “Õãrõ yámi”, ãrĩrãkuma.

19 Marĩpu merã siuñajãrĩ opamurã, marĩ basi gãme iritamumurã irasiriro gããmea. Irire irirã, Jesucristore buremunemowãgãñĩrãkoa. 20 Marĩpu Jesucristore buremurãnorẽ ãgũ merã õãrõ ããrĩmakũ yámi. Irasirirã, musã baari merã Marĩpũyare ãgũsã iririre pirimakũ iribirikõãka! Diayeta

ãārĩpereri Marĩpũ baari pídea õārĩ dita ãārã. Gajigũ ãgũ baabirire mũsã baamakũ ããgũ: “Iri Marĩpũ baadorebiridea ãārã, irire baagũ ñerõ iribokoa”, ãrĩ gũñakeregũ, mũsãrẽ ããkũĩ, baagũ ñerõ iribokumi. Irasirirã mũsã irire baarã, ãgũrẽ ñerõ irimakũ iribokoa. Mũsã irasiriri ñegorãa. <sup>21</sup> Gajigũ Jesucristore bũremugũrẽ marĩ iriri merã ãgũrẽ ñerĩ irimakũ iribokoa, ãrĩrã, ãsũpero iriro gããmea. ãgũ waibũ diĩ baabirimakũ ããrã, irire baabirikõãrõ gããmea. Igui deko pãmudeare ãgũ iirĩbirimakũ ããrã, irire iirĩbirikõãrõ gããmea. ãgũrẽ Jesucristore bũremuturabirimakũ iribirikõãrõ gããmea. <sup>22</sup> “Marĩpũ ãũrõ yũ iriri õãgorãa”, ãrĩ bũremugũno irimarẽ gajerã bũremuturamerãrẽ guaseobirikõãburo. Sugũ: “Marĩpũ ãũrõ ñerõ iribea, waja opabea, diayeta yãa”, ãrĩ gũñagũ, usuyari merã ããrĩgũkumi. <sup>23</sup> Gajigũ gapũ: “Iri baarire baagũ, ñerõ iribokoa”, ãrĩ gũñarikukeregũ irire baagũ, waja opami. Irasirirã: “Marĩ ãsũ irirã, ñerõ iribokoa”, ãrĩ gũñarikukererã irire irirã, waja opãa. ããrĩpereri marĩ irasiriri, ñerĩ iriri ããrã.

## 15

### *Gajerãya ããrĩburidere gũñarõ gããmea, ãrĩ gojadea*

<sup>1</sup> Marĩ Jesucristore bũremurã, ãgũrẽ bũremuturamerãrẽ iritamurõ gããmea. Marĩya ããrĩburi direta iribirikõãrõ gããmea. <sup>2</sup> Marĩ masakakũ marĩ pũro ããrĩrãya ããrĩburire gũñarõ gããmea, ãgũsãde Jesucristore bũremunemowãgãburo, ãrĩrã. <sup>3</sup> Cristode ãgũyama direta iribiridi ããrĩmĩ. Marĩpũya gapũre iridi ããrĩmĩ. Irasiriro ãgũrẽ waadeare Marĩpũya

werenírĩ gojadea pũgue ãsũ ãrĩ gojasũdero ããrĩbú:  
“Mũrẽ ñerõ werenírã, yũguere ãrĩmeétuma”.

<sup>4</sup> ããrĩpereri iripoegue Marĩpũya werenírĩ gojadea marĩrẽ buedorero gojasũdero ããrĩbú. Irire buerã, gũñatura, õãrõ yũjũpũrãkũrãkoa. Irasirirã ñerõ tarirã, Marĩpũ iritamuburire usũyari merã yúa.

<sup>5</sup> Marĩpũ marĩrẽ gũñatura, õãrõ yũjũpũrãkũmakũ irigu, Jesucristo gããmerõsũta mũsãrẽ sugũ pũrã irirosũ sũrosũ ããrĩrikũmakũ iriburo. <sup>6</sup> Irasirirã mũsã ããrĩpererã suro merã Marĩpũre marĩ Opũ Jesucristo Pagũre: “Õãtaria mũ”, ãrĩ, usũyari sĩrãkoa.

### *Jesucristo judío masaka ããrĩmerãrẽ tauburire gojadea*

<sup>7</sup> Jesucristo ãgũ marĩrẽ ñeãderosũta marĩde gajerãrẽ õãrõ gãme bokatĩrĩñeãrõ gããmea, ããrĩpererã Marĩpũre: “Õãtaria mũ”, ãrĩburo, ãrĩrã.

<sup>8</sup> Mũsãrẽ ire werea. Marĩpũ gũa ñekũsãmarãrẽ ãgũ: “Ãsũ irigũra”, ãrĩdeare diaye iridi ããrĩmĩ. Irasirigu Jesucristo judío masakare iritamugũ i ãmũguere aaridi ããrĩmĩ. ãgũ irasiriri merã ãgũ Pagũ ãrĩdeare iri ãmupeodi ããrĩmĩ. <sup>9</sup> Irasũ ããrĩmakũ, judío masaka ããrĩmerã: “Marĩpũ gũadere bopoñagũ õãtarimi”, ãrĩdoregũ, aaridi ããrĩmĩ. Marĩpũya werenírĩ gojadea pũgue gojaderosũta irasiridi ããrĩmĩ. ãsũ ãrĩ gojasũdero ããrĩbú:

Marĩpũre ãsũ ãrĩmi: “Judío masaka ããrĩmerã watopegue mũrẽ usũyari sĩgũra. ‘Turatarigu ããrã’, ãrĩ bayapeogũra mũrẽ”, ãrĩmi, ãrĩ gojasũdero ããrĩbú.\*

\* 15:9 2 S 22.50; Sal 18.49

10 Gajeroguedere àsũ ãrĩ gojasũdero ããrĩbú:  
 Mũsã judío masaka ããrĩmerã Marĩpũyarã judío  
 masaka merã usuyaka! ãrĩ gojasũdero  
 ããrĩbú.✠

11 Gajeroguedere àsũ ãrĩ gojasũdero ããrĩbú:  
 ããrĩpererã judío masaka ããrĩmerã Marĩpũre:  
 “Õãtaria mũ”, ãrĩ, usuyari sĩburo. ããrĩperero  
 marã masaka: “Ìgũ turatarigũ ããrĩmi”,  
 ãrĩburo, ãrĩ gojasũdero ããrĩbú.✠

12 Isaíade àsũ ãrĩ gojadi ããrĩmĩ David pagũ, Isaí  
 wãikũgũre gojagũ:

Isaí parãmi ããrĩturiagũ aarigũkumi. Irasũ aarigũ,  
 judío masaka ããrĩmerã Opũ ããrĩgũkumi.  
 Ìgũsã ìgũrẽ: “Gũare taubu ããrĩmi”, ãrĩ  
 bũremurãkuma, ãrĩ gojadi ããrĩmĩ.✠

13 Marĩpũ marĩrẽ ìgũ õãrõ iriburire usuyari merã  
 yũmakũ irigũ, mũsãrẽ ìgũrẽ bũremurãrẽ usuyari,  
 siuñajãrĩ sĩnemoburo. Irasirirã mũsã Õãgũ dey-  
 omarĩgũ iritamurĩ merã nemorõ usuyari merã  
 yũrãkoa.

14 Yaarã mũsã, yũ péñamakũ, Jesucristore  
 bũremurã, gajerã merã õãrõ ããrĩrikũa. Cristoyare  
 õãrõ masĩa. Irasirirã mũsã basi irire õãrõ gãme  
 weremasĩa. 15 Mũsã irasũ masĩkerepũrũ, i papera  
 pũguere gũiro marĩrõ irire gojãa, mũsã masĩdeare  
 kãtibirikõãburo, ãrĩgũ. Marĩpũ yũre õãrõ irigũ,  
 mũsãrẽ Jesucristoyare buedoregũ pími. 16 Ìgũ yũre  
 irasũ pímakũ, paía Marĩpũre gajino sĩrõ irirosũta yũ  
 judío masaka ããrĩmerãrẽ ìgũrẽ wiadũakoa, ìgũyarã  
 ããrĩburo, ãrĩgũ. Irasirigũ ìgũsãrẽ Jesucristoya

✠ 15:10 Dt 32.43 ✠ 15:11 Sal 117.1 ✠ 15:12 Is 11.10

kerere buea. Y<sub>u</sub> irasũ buemakũ pérã, Jesúre b<sub>u</sub>remurākuma. Īgūsã irasũ b<sub>u</sub>remumakũ ĩãgũ, Marĩp<sub>u</sub> ĩgūsãrẽ: “Ōãrã ããrĩma”, ãrĩ ĩãg<sub>u</sub>kumi. Ōãgũ deyomarĩgũ ĩgūsãrẽ Marĩp<sub>u</sub>yarã waamakũ irig<sub>u</sub>kumi. Irasirig<sub>u</sub> Marĩp<sub>u</sub> ĩgūsãrẽ: “Yaarã ããrĩma”, ãrĩ ñeãg<sub>u</sub>kumi.

17 Y<sub>u</sub> Jesucristore b<sub>u</sub>remugũ, ĩgũ iritamurĩ merã Marĩp<sub>u</sub> y<sub>u</sub>re pídeare òãrõ yáa. Irasirig<sub>u</sub> y<sub>u</sub> moãrĩ merã òãrõ péñáa. 18 Irasirig<sub>u</sub> Jesucristo y<sub>u</sub> merã iridea direta m<sub>u</sub>sãrẽ wereg<sub>u</sub>ra. M<sub>u</sub>sã judío masaka ããrĩmerãrẽ Marĩp<sub>u</sub>re b<sub>u</sub>remumakũ gããmesãgũ, y<sub>u</sub>re iritamumi. Irasirig<sub>u</sub> y<sub>u</sub> bueri merã, y<sub>u</sub> iriri merã m<sub>u</sub>sã judío masaka ããrĩmerãrẽ Marĩp<sub>u</sub>re b<sub>u</sub>remumakũ irimi. 19 Y<sub>u</sub>, Marĩp<sub>u</sub> turari merã iri ĩmurĩ merã, Ōãgũ deyomarĩgũ iritamurĩ merã m<sub>u</sub>sãrẽ bueb<sub>u</sub>. Irasũ bueg<sub>u</sub>, Jesucristo masakare tauri kerere Jerusalén merã buep<sub>u</sub>rori, p<sub>u</sub>r<sub>u</sub> ããrĩpererogue buegorena, p<sub>u</sub>r<sub>u</sub> Ilírico wãik<sub>u</sub>ri nikũgue iri kerere buetũnub<sub>u</sub>. 20 Gajerã buesũña marĩrõgue Jesucristoyare masĩmerãrẽ b<sub>u</sub>ro bued<sub>u</sub>ari merã bueb<sub>u</sub>. Irasũ bueg<sub>u</sub>, gajerã ĩgūsã buedeaguere buewekapeobirib<sub>u</sub>. 21 Irasũ bueg<sub>u</sub>, Marĩp<sub>u</sub>ya werenĩrĩ gojadea pũgue gojasũderosũta irib<sub>u</sub>. ãsũ ãrĩ gojasũdero ããrĩb<sub>u</sub> Cristore masĩbirinerã masĩburire:

Īgũya kerere neõ pébirinerã weresũrākuma. Īgũyare neõ pébirinerã òãrõ pémasĩrākuma, ãrĩ gojasũdero ããrĩb<sub>u</sub>.✧

*Pablo ĩgũ Romague waaburire gojadea*

22 Y<sub>u</sub> gaji makārī marārē buegorenasīā, wāri m<sub>u</sub>sārē īāgū waad<sub>u</sub>akereg<sub>u</sub>, waamasībirib<sub>u</sub> dapa. 23 Dapagueta iri makārīguere y<sub>u</sub> moārī peoa. Irasirig<sub>u</sub> iripoegueta m<sub>u</sub>sā p<sub>u</sub>roguē waad<sub>u</sub>anīdi āārīsīā, p<sub>u</sub>r<sub>u</sub> weya iroguē waag<sub>u</sub>ra, m<sub>u</sub>sā merā āārību. 24 Irasirig<sub>u</sub> Españague waagú, m<sub>u</sub>sā p<sub>u</sub>ro eja, m<sub>u</sub>sārē īā, <sub>u</sub>s<sub>u</sub>y<sub>u</sub>, m<sub>u</sub>sā merā mérōgā āārī, p<sub>u</sub>r<sub>u</sub> m<sub>u</sub>sā y<sub>u</sub>re iritamurī merā tariag<sub>u</sub>ra. 25 Daporare Jerusalēgue waap<sub>u</sub>roribu yāa dapa. Iro marārē Jesucristore b<sub>u</sub>remurārē iritamugū, niyeru āābu yāa. 26 Jesucristore b<sub>u</sub>remurā Macedonia, Acaya marā Jerusalēgue āārīrārē boporārē gūña, niyerure neō, iriud<sub>u</sub>ama īgūsārē iritamurā. Irasirig<sub>u</sub> iroguē iri niyerure īgūsārē sīgū waabu yāa. 27 Judío masaka āārīmerā Macedonia, Acayague āārīrā, judío masaka Jerusalēgue āārīrārē gūñama īgūsārē iritamumurā. Īgūsā irasū gūñarī ōāgorāa. Judío masaka, judío masaka āārīmerā gap<sub>u</sub>re Jesucristoya kerere werep<sub>u</sub>rorima. Irasirirā judío masaka āārīmerā Jesucristore b<sub>u</sub>remurā, Marīp<sub>u</sub> judío masakare: “Sīg<sub>u</sub>ra”, ārīdeare īgūsāde ñeāma. Irasirirā judío masaka āārīmerā īgūsā opari merā judío masakare boporārē iritamurō gāāmea. 28 Irasirig<sub>u</sub> Jerusalén marārē iri niyerure y<sub>u</sub> sī odoadero p<sub>u</sub>r<sub>u</sub>, Españague waagú, m<sub>u</sub>sārē īātariag<sub>u</sub>ra. 29 Y<sub>u</sub> m<sub>u</sub>sā p<sub>u</sub>roguē waagú, Jesucristoya kerere m<sub>u</sub>sārē wereg<sub>u</sub>koa. Irasirirā m<sub>u</sub>sā iri merā ōārō y<sub>u</sub>j<sub>u</sub>pūrāk<sub>u</sub>rākoa.

30 Yaarā, m<sub>u</sub>sā marī Op<sub>u</sub>re Jesucristore b<sub>u</sub>remua. Ōāgū deyomarīgū marīrē gāme maīmakū yāmi. Irasirig<sub>u</sub> y<sub>u</sub> m<sub>u</sub>sārē āsū irimakū gāāmea.

Yure iritamurã, yaa ããrĩburire Marĩpure sērēbosaka, yu moãrĩmarē! <sup>31</sup> Īgūrē yaa ããrĩburire ãsũ sērēbosaka! Judea nikũ marã Jesũre bũremumerã yure ĩgũsã ñerõ iridũamakũ, Marĩpu yure iritamuburire sērēka! Jerusalén marãrē iri niyerure yu sĩmakũ, ĩgũsã irire usũyari merã õãrõ ñeãburire sērēka! <sup>32</sup> Mũsã irasũ sērēmakũ, Marĩpu gããmemakũ, usũyari merã mũsã puro waagũkoa. Irasirigu mũsã merã usũya, siuñajãgũkoa. <sup>33</sup> Marĩpu marĩrē siuñajãrĩ merã ããrĩmakũ irigu, mũsã ããrĩpererã merã ããrĩburo. Irasũta ããrĩburo.

## 16

### *Pablo Romague ããrĩrãrē õãdoreri gojadea*

<sup>1</sup> Gũa merãmo Jesucristore bũremugõ Febe wãikũgo mũsã purogue waabo yãmo. Igo Cencrea wãikũri makãgue Jesucristore bũremurãrē iritamugõ ããrĩmo. <sup>2</sup> Mũsã Jesucristore bũremurã usũyari merã igore bokatĩrĩñeãka! Marĩrē Jesucristore bũremurãrē irasũta õãrõ bokatĩrĩñeãrõ gããmea. Igo wãrãrē iritamudeo ããrĩmo. Yũdere iritamumo. Irasirirã, igo gajino gããmemakũ iritamuka!

<sup>3</sup> Aquila, ĩgũ marãpo Priscilade õãburo. Jesucristoyare yu buemakũ, ĩgũsãde yure buetamuma. <sup>4</sup> Gajerã yure wējẽdũamakũ, ĩgũsã yure iritamurĩ waja ĩgũsãdere mērõ wējẽboyama. ĩgũsã yure irasũ õãrõ iritamurĩrē yu dita Marĩpure usũyari sĩbea. Judío masaka ããrĩmerã Jesucristore bũremurã ããrĩpererã Marĩpure usũyari sĩma. <sup>5</sup> Jesucristore bũremurã Aquilaya wiigue nerēnarãde õãburo. Yu maĩgũ Epenetode õãburo. ĩgũta Asiaguere Cristore

buremurorinugãdi ããrĩmĩ. <sup>6</sup> Mariade õãburo. Igo mũsã merã bure moãyuro. <sup>7</sup> Yaarã Andrónico, Juniade õãburo. Peresu yũ ããrĩmakũ, ãgũsãta yũ merã ããrĩmã. Yũ Cristore buremuburi dupuyuro ãgũsã gapũ buremunugãsianerã ããrĩmã. Jesũs buedoregũ pĩnerã ãgũsãrẽ: “Diayeta õãrã ããrĩma”, ãrĩ werenĩma.

<sup>8</sup> Amplias yũ maĩgũ Jesũre buremugũ õãburo. <sup>9</sup> Urbano õãburo. ãgũde gũa merã moãmi, Jesucristoya kerere masakare buegũ. Yũ maĩgũ Estaquide õãburo. <sup>10</sup> Apelede õãburo. ãgũ diayeta Jesucristore õãrõ buremumi. ãgũ iririkũrire ããrã: “Cristore õãrõ buremugũ ããrĩmĩ”, ãrĩ masĩa. Aristóbuloya wii marãde õãburo. <sup>11</sup> Gajigũ yaagũ judío masakũ Herodiõde õãburo. Narcisoya wii marã marĩ Opũ Jesũre buremurãde õãburo. <sup>12</sup> Trifena, Trifosa õãburo. ãgũsã nome marĩ Opũ Jesũyare moãma. Gũa maĩgõ Pérsidade õãburo. Igode marĩ Opũ Jesucristoyare bure moãmo. <sup>13</sup> Rufode õãburo. ããrĩpererã ãgũrẽ: “Jesucristore õãrõ buremumi”, ãrĩ ããma. ãgũ pagode õãburo. Igo, yũpo irirosũta yũre õãrõ irimo. <sup>14</sup> Asíncrito, Flegonte, Hermes, Patrobas, Hermas, gajerã Jesũre buremurã ãgũsã merã ããrĩrãde õãburo. <sup>15</sup> Filólogo, Julia, Nereo, ãgũ pagumode Olimpã, gajerã Jesũre buremurã ãgũsã merã ããrĩrãde õãburo.

<sup>16</sup> Mũsã gãme õãdorerã, õãrõ mũyari merã, buremurĩ merã pãbũa õãdoreka! ããrĩpererã Jesucristore buremurã mũsãrẽ õãdoreri iriuma.

<sup>17</sup> Yaarã mũsã Jesucristore buremurã, surãyeri mũsã watopegue ããrĩrã ãgũsã iriri merã mũsãrẽ

ñerō irimakū, m̄sārē gāme dukawarimakū irid̄hama. Irasirirā, m̄sārē Jesúyare buedeare goroweod̄hama. Irasirirā irasū āārīrārē wapik̄birikōāka! <sup>18</sup> Īgūsā, marī Op̄u Jesucristo dorerire irirā meta āārīma. Ñerīrē Īgūsā h̄aribejari direta irirā āārīma. Īgūsā ōārō péma ōārī werenírī merā pémas̄itramerārē ārīgatoma. Īgūsā irasū ārīgatomakū, Īgūsārē ōārō p̄t̄h̄yama. Irasirirā ārīgatorimasārē wapik̄birikōāka! <sup>19</sup> Āārīpererā masaka m̄sā Jesucristoyare ōārō iririre mas̄isiamā. Irasiriḡu ȳh m̄sā merā b̄uro h̄sh̄yāa. Ȳh m̄sārē ōārī gap̄re mas̄imakū gāāmekoa. Neō ñerī tamerārē gāāmesābirikoa. <sup>20</sup> Marīp̄u marīrē ōārō siuñajārī merā āārīmakū iriḡu, m̄erōgā p̄ru wātēa op̄u Satanárē béoḡukumi, m̄sārē neō tarin̄gānemobirikōāburo, ārīḡu. Marī Op̄u Jesucristo m̄sārē ōārō iritamunikōāburo.

<sup>21</sup> Timoteo ȳh merā Jesucristoya kerere weretamugorenagū m̄sārē ōādoremi. Yaarā Lucio, Jasón, Sosípater m̄sārē ōādorema.

<sup>22</sup> Ȳh, Tercio wāik̄ḡu i pūrē Pablöre gojabosáa. Īḡu ȳre gojadorerire gojatúa. Irasiriḡu ȳde Jesucristore b̄remugū, m̄sārē Jesucristore b̄remurārē ōādorea.

<sup>23</sup> Ȳh Pablo, Gayoya wii āārā. Īḡuya wiiḡue Jesucristore b̄remurā nerēnama. Īḡude m̄sārē ōādoremi. Erasto, i makā marā oparārē niyeru duripíboerimasū m̄sārē ōādoremi. Cuartode Jesucristore b̄remugū m̄sārē ōādoremi.

<sup>24</sup> Marī Op̄u Jesucristo m̄sārē āārīpererārē ōārō iritamuburo. Irasūta iriburo.

*Pablo usuyari merã gojatũnudea*

<sup>25</sup> Daporare Marĩpũre: “Õãtaria mũ”, ãrĩ, usuyari sĩrã! Marĩpũ, marĩ Opũ Jesucristoya kere merã marĩrẽ ãgũrẽ nemorõ bũremumakũ yãmi. Yũ iri kerere, Marĩpũ ãgũ Cristo merã marĩrẽ tauri kerere werea mũsãrẽ. Neõgoragueta Marĩpũ ãgũ masakare: “Taugũra”, ãrĩdea ããrĩsiadero ããrĩbũ. Irasũ ããrĩkerepũrũ, ããrĩpererã masaka gapũ irire masĩbirinerã ããrĩmã. <sup>26</sup> Daporare Marĩpũyare weredupuyunerã gojadea kere merã ãgũ marĩrẽ: “Taugũra”, ãrĩdeare marĩ masĩa pama. Marĩpũ ããrĩnĩgũ ãgũ dorerosũta ããrĩpereri buri marãrẽ iri kerere, masaka iripoegue masĩbirideare masĩmakũ yãmi. ããrĩpererã masakare ãgũrẽ bũremu, ãgũ dorerire iriburo, ãrĩgũ, irasũ yãmi. <sup>27</sup> Marĩpũ suguta ããrĩmi. ãgũ suguta ããrĩpererire masĩpeogu ããrĩmi. Irasirirã Jesucristo iritamurĩ merã ãgũrẽ: “Õãtaria mũ”, ãrĩ bũremunĩkõãrã! Irasũta irirã!

Iropãta ããrã.

Pablo

## **Marĩpuya Kerere Wereri Turi New Testament in Siriano**

copyright © 2009 Wycliffe Bible Translators, Inc.

Language: Siriano

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Siriano

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
1a0774e8-d152-5929-891b-95e0d2238786